

四庫全書薈要·乾隆御覽本

經部

欽定四庫全書薈要

經部

書纂言卷四之一

詳校官祭酒臣
韋謙恒



書纂言卷四之一

元 吳澄 撰

周書

周自后稷封邠其後公劉居邠太王始遷于岐山
之下曰周武王因以為有天下之號

牧誓

牧地名在紂都朝歌之南近郊三十里文王為
西方諸侯伯三分天下有其二以服事殷武王

嗣為西伯亦如之及十有三年紂惡已極遂率
西方諸侯伐紂師自孟津渡河諸侯不期而會
者八百國師進至牧野誓于將戰之時

時甲子昧爽王朝至于商郊牧野乃誓王左杖黃鉞右
秉白旄以麾曰逖矣西土之人

甲子二月四日也昧冥爽明也昧爽將明未明之時
也鉞大斧也以黃金飾之杖鉞示誅有罪左手杖之
示不必用旄犛牛尾使指揮三軍進退右手秉之以

麾則有力逖遠也言自西土自紂都道理遙遠行力勞苦撫慰之之辭也

王曰嗟我友邦冢君御事司徒司馬司空亞旅師氏千夫長百夫長及庸蜀羌髳微盧彭濮人稱爾戈比爾干立爾矛予其誓

友邦親之也冢君尊之也御事治事之臣也司徒司馬司空三卿也大國三卿下大夫五人士二十七人亞次也卿之貳大夫是也旅衆也卿之屬士是也師

氏以兵守門者千夫長千人之帥百夫長百人之帥
庸濮在江漢之南蜀西蜀羌西羌髳微在巴蜀盧彭
在西北當時諸侯不期而會者八百國友邦冢君諸
夏大國也此八國遠方小國也稱舉戈戟干楯矛戟
之屬長二丈戈短人執以舉之故言稱楯則相並捍
敵故言比矛長立之于地故言立

王曰古人有言曰牝雞無晨牝雞之晨惟家之索今商
王受惟婦言是用昏棄厥肆祀弗答昏棄厥遺王父母

弟不迪乃惟四方之多罪逋逃是崇是長是信是使是
以為大夫卿士俾暴虐于百姓以姦宄于商邑今予發
惟恭行天之罰

晨雞鳴戒曉也索盡也牝雞而晨反常之妖其家必
敗婦妲己也婦言是用猶牝雞司晨也國必亡矣昏
昧也蓋紂為妲己所蔽惑故凡皆昏昧也肆祭名未
詳其義周官以肆獻裸享先王鄭讀為他歷反或曰
肆陳也陳設以祀也答猶報也不答廢宗廟之禮不

知報本也遺先王之遺脩也王父母弟王之諸父諸
母諸弟也廸猶道也不廸絕族親之義待之不以道
也逋亡也卿士卿也四方多罪之人逃亡而歸紂者
乃尊寵而任用之以之居顯位俾毒民為惡也此言
紂反人道之常天罰所宜加也

今日之事不愆于六步七步乃止齊焉夫子勗哉

愆過也步進趨也齊猶整也勗勉也今日之戰不過
六步七步乃止而整齊其行列此告之以坐作進退

之法以戒其輕進也吳氏曰乃止句絕齊馬者陳法也

不愆于四伐五伐六伐七伐乃止齊馬勗哉夫子

伐擊刺也少不下四五多不過六七而止又整齊其行列此告之以攻殺擊刺之法以戒其貪殺也上言夫子勗哉此言勗哉夫子反覆成文以致丁寧之意尚桓桓如虎如貔如熊如羆于商郊弗迓克奔以役西土勗哉夫子

桓桓威武貌。執夷也。虎屬欲將士如四獸之猛而奮擊于商郊也。迓迎也。奔謂來降也。以役西土與周官以役太師左傳以役諸侯意同。紂之衆弗來迎戰而能來降者則受之而俾役使于我西土之人蓋勉其武勇又令其受降也。

爾所弗勗其于爾躬有戮
弗勗謂不勉于前三者

洪範

洪大也。範，謂鑄金之模。匣，禹治水之時，洛出神龜，龜背有文，自一至九。禹則之，第列三才之道，分為九類，以配九數。其綱九，其目五十。凡天下之道，悉包括而無外，故曰洪範。

惟十有三祀，王訪于箕子。

十有三祀，武王克商之年。商謂年為祀。訪，就而問之也。箕，國名。子爵。紂，諸父也。紂囚之為奴。武王克商而釋其囚，以其素傳洪範之學，故下車之初，就問之也。

此篇以箕子所陳錄而為書稱祀不稱年見箕子不臣周之意

王乃言曰嗚呼箕子惟天陰隲下民相協厥居我不知其彝倫攸敘

乃難辭嗚呼歎辭而後言重其事也陰默隲定相助也協和也相協厥居謂重其生利其用正其德也彝倫常道之次序指洪範九疇而言也敘謂各有條理也凡九疇之序皆天所以默定下民而相協其居者

也

箕子乃言曰我聞在昔鯀堙洪水汨陳其五行帝乃震怒不畀洪範九疇彝倫攸斁鯀則殛死禹乃嗣興天乃錫禹洪範九疇彝倫攸敘

堙塞汨亂鯀不順水之性導之就下但為隄防障塞之水失其道汎濫逆流故陰勝火木不能敷榮金不得孕育土不可墾闢五行皆汨亂陳列矣帝即天也以主宰言曰帝震怒謂鯀逆天理得罪於天也畀與

也疇如田之界域數敗也殛死謂放之羽山而死嗣
興謂繼絛而登用錫賜也禹錫洪範九疇謂洛出書
也洛書不出於絛治水之時而出於禹治水之時是
天不以畀絛而以錫禹也洛書不出洪範不作人不
得見此常道之次序所謂數也洛書出洪範作人皆
得見此常道之次序所謂敘也然洛之出書不過龜
背有一二三四五六七八九之文而已五行至六極
皆禹所分配則洪範之書禹所自作也今日天錫禹

何也蓋禹心得此道前此未嘗為書因龜文有九感觸其心遂作洪範九疇雖禹之自為然實因龜文發之若天啟其衷云爾故以為天所錫也

此第一章洪範之總序也

初一

數之初為一一洛書文之在後者

曰五行

曰五行禹所分配也下八疇倣此五行五氣之運行

也不言用者無所待於人而自然也造化萬類無不本於五行故以五行配數之一

次二

一之次為二二洛書文之在右前者

曰敬用五事

敬者此心常存而為一身之主凡言用者有所待於人而後然也蓋主於君人者而言人稟五行之氣而成形故以五事配數之二

次三

二之次為三三洛書文之在左者

曰農用八政

農厚也所以厚於人也先身而後及於人故以八政配數之三

次四

三之次為四四洛書文之在左前者

曰協用五紀

協謂與天合紀如絲之紀先人而後及於天故以五紀配數之四

次五

四之次為五五洛書文之在其中者

曰建用皇極

建立也皇君也極屋棟之名高上之至無能過之也
尊為天子德為聖人人倫之至四方瞻仰而取則焉
是之謂皇極五行順五事敬八政厚五紀協斯可以

建極矣皇極居天下之中洛書之五亦居中故以皇極配數之五

次六

五之次為六六洛書文之在右後者

曰又用三德

又治也德道之得於己者惟皇作極民所視效日遷善而不知無所事乎治也或有未然則治之各有所宜故以三德配數之六

次七

六之次為七七洛書文之在右者

曰明用稽疑

明謂決其疑也稽古作卜考也謂考之卜筮也德雖
應變無方然有疑事非人謀所能決者必須謀之鬼
神故以稽疑配數之七

次八

七之次為八八洛書文之在左後者

曰念用庶徵

念謂反身思省也庶衆徵驗也雖聽命於鬼神猶不敢自是也必驗吾之得失於天故以庶徵配數之八次九

八之次為九九洛書文之在前者

曰嚮用五福威用六極

威畏古字通用嚮者慕之而欲其有威者畏之而欲其無極者禍之至極者也五福人心所同嚮慕也君

之所嚮在此而常願民之獲此福則凡可以致福者靡不勉矣六極人心所同畏避也君之所畏在此而常恐民之至此極則凡可以致極者靡不戒矣自五行至庶徵皆得其道則協氣成象人蒙休祥而五福應之或失其道則乖氣成象人罹殃咎而六極應之故以五福六極配數之九而為九疇之終

此第二章洪範之綱也其下九章洪範之目也

洛書文

五行一曰水二曰火三曰木四曰金五曰土

天一生水地二生火天三生木地四生金天五生土
朱子曰五行質具於地而氣行於天以質而語其生
之序則曰水火木金土以氣而語其行之序則曰木
火土金水

水曰潤下火曰炎上木曰曲直金曰從革土爰稼穡

此五行之材水能潤能下火能炎能上木可曲可直

金可從可革土宜稼宜穡稼謂耕治穡謂收穫蘇氏
曰曰者所以名之也土不曰曰而言爰爰於也土無
成名無專氣無定位言於此稼穡而非所以名之也
新安王氏曰土非止於稼穡以民生粒食之用言之
也潤下用之於灌溉炎上用之於烹飪曲直之斲削
從革之鎔範用之於宮室器用也

潤下作鹹炎上作苦曲直作酸從革作辛稼穡作甘

作猶為也水之鹵味鹹火之焦味苦木之實味酸金

之綉味辛土之稼穡味甘五行各有聲色氣味此獨
言所作之味以見其餘

此第三章

二

洛書文

五事一曰貌二曰言三曰視四曰聽五曰思

貌者身所動之容言者口所發之辭視者目所見於
外聽者耳所聞於內思者心所處運於中

貌曰恭言曰從視曰明聽曰聰思曰睿

恭容莊而謹也從辭順而達也明所見昭徹聰所聞
審詳睿通於幽微陳氏曰天生烝民有物有則貌言
視聽思物也恭從明聰睿則也

恭作肅從作乂明作哲聰作謀睿作聖

貌莊敬則其心齊一而不二故作肅言順達則其心
理治而不亂故作乂視昭徹則其心知識了悟而不
眩故作哲聽審詳則其心計慮精當而不苟故作謀

思通於幽微則其心可馴至於無所不通故作聖

此第四章

三

洛書文

八政一曰食二曰貨三曰祀四曰司空五曰司徒六曰
司寇七曰賓八曰師

民生所最急者務農重穀以足其食有食則種樹阜
通以殖其貨既有以養生必有以事死故祀以報本

追遠養生事死在乎安居故司空掌土以定其居居
既得安不可無教故司徒掌教以導其善教之不從
則齊之以刑故司寇掌禁以懲其惡內治舉而後及
外故賓以親邦國往來交際有其禮師以平邦國立
武足兵有其備用師非得已故最後八政或言其事
或言其官此一疇該周官六官之事食貨天官所總
祀春官所掌司空冬官也司徒地官也司寇秋官也
賓亦秋官所掌師夏官所掌

此第五章

四

洛書文

五紀一曰歲二曰月三曰日四曰星辰五曰歷數

歲自冬至至來歲冬至凡三百六十五日四分日之一日行天一周也以分至啟閉定歲之四時是為一歲之紀月自合朔至來月合朔凡二十九日六辰有一奇月與日一會也以晦朔弦望定月之大小是為一

月之紀日自日出至來日日出歷十二辰日繞地一匝也以晨昏出沒定晝夜長短是為一日之紀星謂二十八宿衆經星辰謂天之壤因日月所會分經星之度為十二次觀象測候以驗天之體也是為星辰之紀歷謂日月五緯所歷之度數謂一二三四五六七八九十百千萬七政行度各有盈縮疾遲立數推算以步天之用也是為歷數之紀

曰王省惟歲卿士惟月師尹惟日歲月日時無易百穀

用成又用明俊民用章家用平康日月歲時既易百穀
用不成又用昏不明俊民用微家用不寧

五紀雖有專官掌之然王與羣臣亦自加省察恐其
測候推筭之或差所以欽天也卿士師尹不言省者
省文師尹衆尹謂大夫士也尊者所省者大而簡卑
者所省者小而繁王省一歲之四時卿士省每月之
大小師尹省每日之長短易謂與天不相合而差殊
所省一歲一月一日之時皆與天協則物產收熟政

治光顯賢人之未用者用羣臣之有家者安其或一
日一月一歲之時皆與天殊則其應反是此申言歲
月日之紀

庶民惟星星有好風星有好雨

庶民之所省者惟觀星而已星有好風者有好雨者
觀星則知將有風雨而避就之以耕種獲斂也此申
言星辰之紀

日月之行則有冬有夏月之從星則以風雨

日之行冬至道極南度極盈冬至後漸北漸縮夏至
道極北度極縮夏至後漸南漸盈月之行春從青道
夏從朱道秋從白道冬從黑道青朱出陽道白黑出
陰道月從箕度則風從畢度則雨凡此皆用歷數推
筭而知之此申言歷數之紀

此第六章

五

洛書文

皇極皇建其有極

釋皇極二字言皇極者謂人君建立其有極也

凡厥庶民無有淫朋人無有比德惟皇作極

庶民在下之民淫謂沈浸為惡朋類也人在官之人
比謂阿黨徇私民無惡類人無私心皆君之德有以
為之標準也

凡厥庶民有猷有為有守汝則念之不協于極不罹于
咎皇則受之惟時厥庶民于汝極錫汝保極

念叶
音紐

有猷謂工於謀事有為謂敢於作事有守謂操持不
變時是也庶民之中其有有謀為操守者固當念之
而勿忘其有雖未合於善道而亦未陷於罪戾者亦
且容之而勿責則是庶民皆有得於汝之極而使汝
長保此極矣

人之有能有為使羞其行而邦其昌無虐斃獨而畏高

明時人斯其惟皇之極

行叶音杭
明叶音芒

人之有才能有作為者使進其行務令才德兼全而

國可賴之以昌斃獨孤立無援者高明勢位崇顯者不以其無援而困沮之不以其有勢而尊敬之但論其才行之何如耳是則人亦有得於君之極也

曰皇極之敷言是彝是訓于帝其訓凡厥庶民極之敷言是訓是行以近天子之光曰天子作民父母以為天

下王

言叶干斤切訓叶平聲行音杭

敷廣布也人君立極者所敷之言即此常道而教訓之皆以天理而教訓也庶民於立極者所敷之言即

此教訓而踐行之斯能親近天子道德之光矣又言
天子能使庶民近其光斯可作民之父母而為天下
之王矣此一節申言庶民無有淫朋之意

無偏無陂遵王之義無有作好遵王之道無有作惡遵
王之路無偏無黨王道蕩蕩無黨無偏王道平平無反
無側王道正直會其有極歸其有極

陂舊作頗
義叶音義

偏謂不正陂謂不平遵循也義天理之宜也好惡有
當然之理不容以私意作為考工記千夫有道萬夫

有路此言道路互辭取韻叶耳道路即義之可通行者也黨謂阿比偏者私於己黨者私於人也蕩蕩蕩蕩大貌平平夷易貌反側皆謂不正正謂不偏直謂不枉其正會如會同之會歸如歸家之歸遵義遵道遵路會其極也蕩蕩平平正直歸於極也此一節申言人無有比德之意

此第七章

六

洛書文

三德一曰正直二曰剛克三曰柔克

正直不偏於剛不偏於柔剛柔適中徑直行之而無所枉也克勝也剛克剛勝於柔也柔克柔勝於剛也平康正直彊弗友剛克變友柔克

平謂平均不彊不弱也康安而無事也彊弗友謂剛彊不相順助也變友謂柔和相順助也平康者治之以正直如周官所謂刑平國用中典也彊弗友者治

之以剛克如周官所謂刑亂國用重典也變友者治之以柔克如周官所謂刑新國用輕典也或寬或猛或寬猛適中各隨其時俗而施之有不同焉

沈潛剛克高明柔克

沈謂沈抑下而不上潛謂潛藏內而不外高謂高亢上而不下明謂明顯外而不內沈潛者易至於卑悔故以剛克治之進之於高明也高明者易至於浮露故以柔克治之退之於沈潛也各因其資質而待之

有不同焉

此第八章

七

洛書文

稽疑擇建立卜筮人乃命卜筮曰雨曰霽曰蒙曰驛曰
克曰貞曰悔凡七卜五占用二

鑽龜曰卜揲著曰筮選擇知卜筮之人而建立之以
為卜筮之官及有疑事之時乃命之使卜命之使筮

卜兆有五雨水兆霽火兆蒙土兆驛木兆克金兆筮
卦有二貞內卦悔外卦卜筮皆有占此占字專言筮
衍忒立時人作卜筮三人占則從二人之言

三人句絕衍忒未詳朱子曰衍是多剩忒是差錯或
曰卜筮若止一人則或有差錯無從正救故多剩其
人數俾之參互推究其或有差錯者立是人為卜筮
之官各三人人各一法三卜三筮所占或皆吉或皆
不吉若一不吉二吉則作吉用一吉二不吉則作不

吉用故曰占則從二人之言

汝則有大疑謀及乃心謀及卿士謀及庶人謀及卜筮
新安王氏曰大疑謂國有非常之事未能決者周官
有大事衆庶得至外朝與羣臣以序進而天子親問
馬朱子曰卜筮處末者占法先斷人志後命著龜

汝則從龜從筮從卿士從庶民從是之謂大同身其康
彊子孫其逢吉

康彊無疾而壽逢大也朱子曰此條無問尊卑其謀

皆配於龜筮故為大同之吉人心之虛靈知覺無異於鬼神雖龜筮之靈不至踰於人也故自此以下必以人謀為首然鬼神無心而人有欲人之慮未必盡能無適莫之私故自此以下皆以龜筮為主人雖不盡從不害其為吉若龜筮兩逆則凶咎必矣

汝則從龜從筮從卿士逆庶民逆吉

朱子曰此條惟君謀配於龜筮亦吉

卿士從龜從筮從汝則逆庶民逆吉

朱子曰此條惟卿士謀配於龜筮亦吉

庶民從龜從筮從汝則逆卿士逆吉

朱子曰此條惟民謀配於龜筮亦吉

汝則從龜從筮逆卿士逆庶民逆作內吉作外凶

內謂祭祀冠婚外謂出師征伐朱子曰此條龜筮一
從一違亦不可以舉事但筮短龜長又尊者之謀配
合故內事猶可外事則凶

龜筮共違於人用靜吉用凶

靜謂外事內事俱不作也朱子曰此條龜筮皆逆於人人謀縱有從者動則凶矣

此第九章陳氏曰卜筮者天之所示也人事盡而後可以求之天故必皇極建三德又至於有疑然後謀及人而斷之以卜筮苟人事不協而惟卜筮之從雖得吉兆而無益也故稽疑必在於皇極三德之後

洛書文

庶徵曰雨曰暘曰燠曰寒曰風

陰陽之氣交則蒸而為雨氣散則開而為暘陰退陽
進則為燠陽退陰進則為寒陰陽旋繞扇播則為風
燠熱涼寒四時之氣也雨暘風佐四時之氣而化育
不言熱涼止言燠寒者燠為熱之徵寒為涼之極長
物舉其始成物舉其終也雨與暘對燠與寒對風行
於四時之間

曰時五者來備各以其叙庶草蕃廡

備猶有也是五者之來其有各應期而不亂所謂時
雨時暘時燠時寒時風也庶草物之尤微者此茂盛
則萬物咸遂可知所謂休也

一極備凶一極無凶

極備謂過於有極無謂過於無一者過於有謂恒雨
恒暘恒燠恒寒恒風也一者過於無謂恒雨則無暘
恒暘則無雨恒燠則無寒恒寒則無燠或彌旬彌月

無風也凶謂饑饉疫癘由此起所謂咎也

曰休徵曰肅時雨若曰乂時暘若曰哲時燠若曰謀時
寒若曰聖時風若

禎祥曰休皆因五事之敬而有此徵肅有滋潤意時
雨似之乂有開豁意時暘似之哲昭融有和暖意時
燠似之謀審密有凝結意時寒似之聖無所不通時
風似之

曰咎徵曰狂恒雨若曰僭恒暘若曰豫恒燠若曰急恒

寒若曰蒙恒風若

災沴曰咎皆因五事之不敬而有此徵狂者貌之放
蕩淫雨似之僭者言之差忒亢暘似之豫則昏惰散
緩而不收恒煥似之急則躁率縮粟而不舒恒寒似
之蒙則心冥迷而無主猶風之終日飄揚而無定也
凡此休咎之徵因其事而各以類應

此第十章

九

洛書文

五福一曰壽二曰富三曰康寧四曰攸好德五曰考終
命

五福以人所尤好者為先生而為人孰不好生而惡
死壽者其生之長也故先之以壽有生必有以養故
繼之以富雖有以養又必身安而心寧故繼之以康
寧身康心寧又必知為善之樂故繼之以攸好德考
成也成全以終其命謂盡其天年而不死於戰鬪刑

戮也有雖壽而不得善終者故卒之以考終命

六極一曰凶短折二曰疾三曰憂四曰貧五曰惡六曰弱

六極以人所尤惡者為先不得其死曰凶凶者考之反也疾憂者康寧之反也貧者富之反也陷於不善者惡也雖欲為善而不能自彊者弱也惡弱者好德之反也

斂時五福用敷錫厥庶民

言人君當斂聚此五福以廣布與庶民

凡厥正人既富方穀而康而色曰予攸好德汝則錫之福汝弗能使有好于而家時人斯其辜予其無好德汝雖錫之福其作汝用咎

色當作寧字之誤也正人謂為正長之官者穀祿也詩曰仳仳方有穀好如鄉黨自好者之好謂自愛重也言正長之官使之既富足有祿而又身得以康心得以寧其人必能為善而曰予所好者德則是汝實

與之以此福也汝若不能先使之富且康寧則彼在
家無所顧藉不自愛重將陷於罪而無好德之心汝
雖欲與之以福而彼之所作為無非得罪於汝之事
矣上為庶民言斂五福此為在官之人言而不及壽
與考終命者蓋以人臣委質致命不敢有全身保生
之心然苟真能好德則天自報之以壽考也

惟辟作福惟辟作威惟辟玉食

辟君也威謂六極之可畏玉食謂珍美之食也此言

能為民福禍者惟君一人此其所以獨享天下珍美之奉也

臣無有作福作威王食臣之有作福作威王食其害于而家凶于而國人用側頗僻民用僭忒

臣謂大臣人謂小臣頗不平僻不中也臣佐君治民然無有能自為福禍者故亦不敢享至尊之奉若為臣而有君之權享君之奉則是僭亂之臣君臣必俱傷敗凶於臣之家害於君之國有位之人效之而側

僻天下之民效之而僭越差忒矣

此第十一章

金縢

蔡氏曰武王有疾周公以王室未安殷民未服根本易搖故請命三王欲以身代武王之死其冊文藏於金縢之匱編書者序其事之始末因以金縢名篇孔疏曰發首至王季文王敘將告神史乃冊至屏壁與珪記告神之辭乃卜至乃

瘳記卜吉及王病瘳之事武王既喪以下記周
公流言居東及成王迎歸之事也

既克商二年王有疾弗豫

克商以後之二年言克商未久也有疾初得疾弗悅
豫則疾篤也

二公曰我其為王穆卜

二公太公召公也穆敬也古者國有大事卜則公卿
百執事咸在肅敬以聽命於神故曰穆卜

周公曰未可以戚我先王

葉氏曰戚者休之反也二公以武王疾為先王不佑而遺之戚如雲漢之詩言父母先祖胡寧忍予者故周公以為未可因武王之疾而遽戚我先王也

公乃自以為功為三壇同墠為壇于南方北面周公立馬植璧秉珪乃告大王王季文王

功事也自以為功謂以身自任其事築土曰壇除地曰墠同除地一所而築三壇設三王之位皆南向三

壇之南別為一壇北向周公所立之地也古禮凡於
遠祖之無廟者及宗子去其宗廟而在他國者及支
子雖在本國而於禮不得入廟者或有禱告必須擇
地為壇以棲祖考之神周公之為子為臣故不敢告
於廟而為壇以告也璧珪所以禮神植謂置之於壇
秉謂執之以手二公為王穆卜不過欲占其病之安
否何如非能轉凶為吉也周公以介弟之親任冢宰
之重愛兄憂國其情切至為宗社計其慮深遠有非

二公所得與者故却二公之卜而自任其事也

史乃冊祝曰惟爾元孫某遘厲虐疾若爾三王是有丕
予之責于天以旦代某之身予仁若考能多材多藝能
事鬼神乃元孫不若旦多材多藝不能事鬼神乃命于
帝庭敷佑四方用能定爾子孫于下地四方之民罔不
祇畏嗚呼無墜天之降寶命我先王亦永有依歸令我
即命于元龜爾之許我我其以璧與珪歸俟爾命爾不
許我我乃屏璧與珪

史掌治文書冊作冊以書告神之辭也祝掌接鬼神

祝曰者祝述冊書之辭以告也元孫長孫某武王名

邁遇也厲惡虐害丕子太子也責猶責其侍子之責

旦周公名武王為文王之丕子若爾三王之靈在天

責其來服事左右願以身代之材才智藝技能周公

謂我之仁德如父又多材藝從三王在天則能供給

服役於鬼神武王之德雖亦能然而材藝不如我之

多縱死而從三王於天亦不能供給服役於鬼神但

當留下地作民主乃受命於天帝之庭廣佑四方之
民而君之矣用能定爾三王之子孫皆有分土在於
下地四方之民無不敬畏武王之威德然天命方新
人心初服未久未固未可遽死也武王一身宗社所
繫三王愛念保護毋令其死而墜失天所已降之命
則我先王之祀亦永有所賴以存也寶命即帝庭之
命也謂之寶者貴重之也即就也命三王之命也元
龜大龜也就受三王之命於元龜謂決之於卜也卜

之吉是三王之許我卜之不吉是三王之不許我也
許我則王疾瘳而已代死得從三王在天事鬼神故
以此璧與珪歸家而俟三王許我之命屏藏也不許
我則王疾弗瘳而已不死不得從三王在天而事鬼
神而此璧與珪無所用故藏之也案周公告三王稱
爾稱我無異人子之侍側以語其親可見終身慕父
母不死其親之實孝愛忠誠之至也又案武王喪於
克商七八年之後天下大勢已定猶有武庚之叛周

室幾危設使喪於克商甫二年之時則禍變又將若何周公蓋觀事勢之必至於此所以欲代武王之死也或曰死生有命而周公欲代死理有之乎曰有匹夫匹婦發一誠心可動天地況聖人至誠至公心與天一志壹則動氣固有改移造化之理若理之所無則周公豈為之哉

乃卜三龜一習吉啟籥見書乃并是吉公曰體王其罔害予小子新命于三王惟永終是圖茲攸俟能念予一

人

卜筮必立三人以相參考洪範所謂立時人作卜筮
三人是也三龜者三人所卜之龜一猶齊也習重也
并並也謂三龜之兆齊相繼而吉及啟籥見兆書而
其占果並吉也體兆之體周官君占體大夫占色史
占墨卜人占坼公言視卜兆之體王之疾其可無害
予小子周公自謂予一人謂武王也公視卜知王疾
必瘳而已亦不代死故言我新受命於三王惟當永

久克終是圖三王既不令我代死則今此所俟三王之命但俟其能愛念武王而使其疾之瘳矣

公歸乃納冊於金滕之匱中王翼日乃瘳

公歸周公歸其私家也冊即史所作之冊滕緘也匱藏物之器金滕之匱藏卜書之匱以金緘之也翼日公歸之明日瘳愈也言公既卜而歸卜人乃以周公請命之冊納於匱中與卜書並藏也蔡氏曰金滕之匱藏卜筮書每卜則以告神之辭書於冊既卜則納

冊於匱而藏之前後卜皆如此王氏曰卜筮既畢而不敢褻必納其冊書於匱異時將卜則復啟焉乃國家故事非特為此匱藏其冊為後來自解之計也愚謂匱所以藏卜書卜則啟匱此常事也惟周公此時之卜有與常時不同者以先有冊書告三王而後卜也故既卜之後其冊書因得同藏於卜書之匱若常時之卜則史述卜主之命告卜人蓋不書於冊既卜亦無冊可藏也故前此二公欲卜武王之疾後此成

王欲卜風雷之變皆不聞有冊王氏蔡氏之說未當而謂非周公藏其冊為後來自解之計則是

此第一章

武王既喪管叔及其羣弟乃流言于國曰公將不利于孺子

武王之疾既瘳數年之後乃喪管叔名鮮武王弟周公兄也羣弟蔡叔度也非長弟故曰羣弟猶儀禮非長子者曰衆子也流言如水流自彼至此也國周國

也其言發自紂都而傳至周國也孺子成王也公將
不利于孺子謂欲奪其位也蓋商有天下六百年賢
聖之君六七作德澤之入人者深紂為無道諸侯離
心而雍梁荆豫徐揚六州歸周冀兗青三州猶屬商
及武王克商封帝乙元子微子啟於宋以奉湯祀分
紂故都為三以母弟三人為三監紂都之北為邶封
管叔南為鄘封蔡叔東為衛封康叔紂子武庚居殷
墟有司厚給其廩祿而已蓋未嘗與之土地人民也

然殷民懷商不忘武王崩成王幼周公攝政武庚煽惑管叔以謂兄亡弟及管叔當立今周公弟也而居內將為天子管叔兄也而居外不過為諸侯管叔及弟蔡叔唱為流言以惑王而閻公將西向奔喪以軍師從而圖不軌周既有釁武庚俟管蔡二叔去國之後收其遺民叛周而復商南有徐戎淮夷等國亦相挺而起所謂管叔監殷以殷叛者其事情之實蓋如此而前史所載失其傳也

周公乃告二公曰我之弗辟我無以告我先王

辟法也周公自責言今此召謗致亂是我之所為不法也王室將危我何告我先王乎亟能弭變安王室乃可於是大告諸侯東征叛人

周公居東二年則罪人斯得

居東謂出征而居東方也二年出征之第二年也罪人謂叛人武庚得謂捕獲也武庚伏誅而管叔亦死殷亂遂平林氏曰自周公居東以下其事跡皆在大

誥之後然實與周公請死之事相為終始故於此併載之

于後公乃為詩以貽王名之曰鷓鴣王亦未敢誚公

于後謂罪人斯得之後貽遺也鷓鴣詩見今豳風以言責人曰誚管叔流言謂周公將為不利公不俟王疑之釋而自往征之蓋國家安危重於一身聖人之心至公無我豈若小丈夫然避小嫌而妨大計乎以王室至親兼東方諸侯伯而仇讎之人煽惑我兄弟

離間我君臣以傾覆我國家禍變艱大事機迫急拯
溺救焚惟恐不及征之其可少緩乎逮叛亂既平周
公居東不歸作鴟鴞之詩以貽王極言周家創造王
業之難而有傾覆之者其情痛哀庶幾成王之悟而
王疑終於未釋但亦未敢誚公而已

秋大熟未獲天大雷電以風禾盡偃大木斯拔邦人大
恐王與大夫盡弁以啟金縢之書乃得周公所自以為
功代武王之說二公及王乃問諸史與百執事對曰信

噫公命我勿敢言王執書以泣曰其勿穆卜昔公勤勞
王家惟予沖人弗及知今天動威以彰周公之德惟朕
小子其親逆我國家禮亦宜之王出郊天乃雨反風禾
則盡起二公命邦人凡大木所偃盡起而築之歲則大
熟

東征之二年罪人斯得而周公尚留居東都此其三
年之秋也大雷電以風天之怒而渝也弁皮弁常服
玄冠端畏天威敬鬼神故王與大夫盡改服皮弁素

積啟金縢所藏卜書以下而於其匱中見周公請命之冊諸史百執事供給卜筮之人昔日從周公以下者今王將卜故為卜而俱至二公及王得周公代死之說遂以問之則為信有此事噫心不平之聲又慨歎而謂公常有命令勿與人言故我勿敢言爾蓋請命代死出於一時迫切之誠變禮也非常道也故不令宣洩成王初意欲卜天變之為何既得此說始知昔日周公如此用心以勤勞於王家王自悔年幼不


及知不免為流言所惑夫周公肯以身代兄死其肯
奪兄子之位乎以公之忠聖而被謗蒙疑至今在外
公無負於王王有負於公矣天動威譴告以彰顯周
公忠聖之德王因此感悟知天變為公故曰其勿穆
卜王疑既釋亟欲公歸謂我當親迎而國家所以待
公之禮亦當宜稱公自東歸將至王出郊以迎而天
乃雨陰陽和也反偃禾之風而禾之偃者盡起天意
回也感應之速如此凡大木為風所拔者既顛仆於

地矣風所偃者根未拔而榦歆斜則合衆力支拽之
起其榦令不偃又築其根令堅固也前言秋大熟後
言歲則大熟其辭相始終以見未穫而禾偃既偃而
復起雖遭風災而不害也親迎俗本親作新今從馬
氏本

此第二章



書纂言卷四



覆校官編修臣張秉愚

校對官檢討臣龔大萬

騰錄監生臣應夢麟

欽定四庫全書薈要

經部
書纂言卷四之二

詳校官祭酒臣韋謙恒



書纂言卷四之二

元 吳澄 撰

大誥



誥辭有大誥二字取以名篇武王克商誅紂其
子武庚曷嘗一日忘周哉顧周未有隙可乘又
在已無土地人民之資耳會武王崩成王幼周
公攝政管叔不平此可乘之隙也武庚說管叔
聳周公之罪舉兵西向其心豈為管叔計直欲

伺管蔡二叔去商則已得收遺民據故都以復

商也管蔡庸愚武庚狡黠管叔身行叛事而實

為武庚所陷武庚身造叛謀而先藉管叔以發

禍機可畏折之於方萌則易遏之於已熾則難

所以不得不速出師也此誥蓋作於武王崩之

年他書載武王崩在十二月若果爾東征亦當

不出是月也成王元年殷亂平二年周公歸三

年伐奄遷殷民七年營洛

王若曰猷大誥爾多邦越爾御事弗以天降割于我家
不少延洪惟我幼冲人嗣無疆大厯服弗造哲迪民康
矧曰其有能格知天命

周公以冢宰攝行王事公之東征代王親征也國之
號令當自天子出故稱王命以告猷發語辭大誥猶
言普徧以告也多邦謂諸侯之君御事謂其治事之
臣不弔猶言不幸謂不為天所閔恤也割猶害也遭
大喪禍其痛如割也延猶待也不少延謂伐殷未久

武王遽崩也無疆謂無有境界窮盡之處言其大也
歷天之歷數也服猶事也造猶造道之造格猶格物
之格武王受天歷而服王事此至大之任大惟我以
幼小沖弱之人而嗣守之弗能造於明哲以導民於
安康是人事且有未盡況敢言能格知天命乎

已予惟小子若涉淵水予惟往求朕攸濟敷賁敷前人
受命茲不忘大功

渡水曰涉往猶進也渡訖曰濟敷廣也賁飾也若涉

深淵之水進而求所以濟恩欲增廣脩飾以增廣前人所受之命使其命愈隆愈固此不忘前人創業之大功也。

予不敢閉于天降威用寧王遺我大寶龜紹天明即命曰有大艱于西土西土人亦不靜

閉謂掩藏諱護降威即降割也寧王武王也紹謂龜能承接天意以傳於人即命就受天之命於龜也曰者龜兆之占如此云也大艱謂大患難也天降喪禍

於我未知天意若何不敢諱護不問故用寧王所遺
我之大寶龜以繼紹天明卜未來之吉凶而龜兆之
占預報以武庚叛亂之事謂將有為大患難於西土
者蓋言武庚叛周也雖西土之人亦為不安静之事
蓋言管蔡雖是周人而亦為亂也此武王崩後所卜
越茲蠢殷小腆誕敢紀其敘天降威知我國有疵民不
康曰予復反鄙我周邦

蠢如蟲之物而無知也殷謂武庚腆厚也紀理絲也

敘傳世之次也疵猶隙也國有疵謂二叔謗周公以
惑成王也民即人不康即不靜謂動兵也反謂反於
常理也鄙遠邑也武王崩後龜兆預告以將有叛亂
及此果有蠢然而動者殷餘小小腆厚之武庚大敢
理其傳系以已為殷王之子當繼世而王適值天降
喪禍於周知二叔與周公有隙而為不安靜之事遂
乘此隙而曰此子殷家興復之時欲亡周而反以周
邦之土地為商畿之遠鄙此武庚之叛謀也當時蠢

動蓋是管蔡率殷民以來誥辭直歸罪武庚者指出
叛謀所起禍根所在而言也

今蠢今翼曰民獻有十夫予翼以于救寧武圖功我有
大事休朕卜并吉

民獻未仕之賢也于往救撫安也寧武亦謂武王初
喪未謚以其能安天下曰寧王有安天下之武功故
曰寧武自嗣子言之則曰寧考樂言之曰寧人自後
人言之則曰前寧人大事戎事也并吉三龜皆吉也

今殷民蠢動於今日之明日有賢者十人來為我輔
翼以往撫安武王所圖之功克殷有天下者武王所
圖之功也使殷再復則前功隳矣往平殷亂所以救
其圖功也我之戎事有克捷休祥之徵故卜三龜而
皆吉此東征之時所卜聖人雖灼見事理之當為尤
必協人謀鬼謀而不自用也

肆予告我友邦君越尹氏庶士御事曰予得吉卜予惟
以爾庶邦于伐殷逋播臣爾庶邦君越庶士御事罔不

反曰艱大民不靜亦惟在王宮邦君室越予小子考翼
不可征王害不違卜

尹氏大夫庶士上中下士御事指卿而言也逋播臣
謂殷亡而武庚逋逃播蕩也以此見周末嘗封武庚
為諸侯而自司馬遷以來皆謂紂誅而以武庚續殷
祀者所傳謬誤也越予小子設為諸侯自稱之辭考
謂揆度審察翼即十夫予翼者周公以十賢來助龜
卜協吉決於往伐而邦君御事乃不欲往曰患難之

大而人之為不靜者亦惟在王之官邦君之室蓋謂
王惑流言二叔不咸也我衆諸侯揆度審察十夫之
謀不可往征王曷不違卜而罷東征之役乎或曰王
師以順討逆而諸侯敢不從命何也曰管蔡二叔誣
謗周公舉兵內嚮必以獎輔王室為名成王幼沖方
且疑惑豈遽目之為逆武庚之叛謀甚深黨附二叔
勸之西行實欲二叔去殷亂周而已得以據殷叛周
也二叔既墮其術中衆人淺識亦但見二叔有不咸

之迹而不知武庚懷叵測之心諸侯不欲東征者以
二叔王室至親而武庚叛形未露也惟周公上智洞
燭幾先明徵其辭顯斥其罪專指武庚而不及二叔
兵法所謂上兵伐謀先人奪人之心者固聖人之餘
事邦君御事乃以艱大不靜惟在二叔而不及武庚
愚智所見相去懸絕若此儻武庚謀泄迹著人人皆
知其叛則諸侯安敢不從征討而自比於逆亂哉
肆予沖人永思艱曰嗚呼允蠢鰥寡哀哉予造天役遺

大投艱于朕身越予沖人不卬自恤義爾邦君越爾多
士尹氏御事綏予曰無咎于恤不可不成乃寧考圖功
永思猶曰深長思也卬我也咎謹慎勤勞之意我深
思今日之患難而曰彼之蠢信乎為無知而動矣然
少壯被驅以行鰥寡不得其養可哀也哉我嗣受天
命興師討罪乃天役也為此天役所謂大艱皆遺之
投之於我一身謂我身自當之也但我不暇自憂一
身所憂者在前人之基業意謂爾邦君等知義必安

我曰無過於憂不可不勇往定亂以成汝寧考所圖之功今爾反曰不可征豈為義乎

已予惟小子不敢替上帝命天休于寧王與我小邦周寧王惟卜用克綏受茲命今天其相民矧亦惟卜用嗚呼天明畏弼我不丕基

我之往征蓋不敢廢上帝之命也天降休命於寧王由百里小邦而興周惟卜之吉而用以伐紂遂能安受此天命而為王今天意其相助我周之人猶寧王

時也況我亦惟卜之吉而用以討叛卜吉則天意可知矣故嘆而言曰天之明天之威輔弼我大大之基業其可不順天命以討彼之逆天命者乎

王曰爾惟舊人爾丕克遠省爾知寧王若勤哉天閱罔我成功所予不敢不極卒寧王圖事肆予大化誘我友邦君天棐忱辭其考我民予曷其不于前寧人圖功攸終天亦惟用勤罔我民若有疾予曷敢不于前寧人攸受休畢

爾西土邦君御事皆舊事武王之人爾大能遠省前

事豈不知武王定天下若是之勤勞哉閔者隱匿不

顯之意天實隱匿勤慎與我以成完前人圖功之所

我不敢不極盡以卒其所圖之事也化謂化其固滯

誘謂誘之順從天非誠有言辭以命我但考我之民

民賢來助即天意也予曷其不於前人所圖之功而

思所以終之乎天亦惟用勤謹佑我周之人若有疾

病當速攻治予曷其不於前人所受之休命而思所

以畢之乎

王曰若昔朕其逝朕言艱日思若考作室既底法厥子
乃弗肯室矧肯構厥父苗厥子乃弗肯播矧肯穫厥考
翼其肯曰予有後弗棄其肆予曷敢不越卬教寧王大
命若兄考乃有友伐厥子民養其勸弗救

昔昔日也謂初欲東征之時言語辭或曰猶謂說及
也如昔日之意則我已往矣我亦於此患難日日思
之以至於今譬如作室父既底定廣狹之度矣其子

乃不肯為之築基況肯為之造屋乎譬如耕田父既反土而苗矣其子乃不肯為之播種況肯使之成熟而穫乎其子如此其父之輔翼者其肯曰予有後嗣能不弃父之基業乎予者予其父也蓋武王定天下如作室之底法如耕田之既苗今不能討平叛亂以終武王之業則是不肯堂不肯播矣況可望其肯構肯穫而保天命於無窮乎故我何敢不以我而撫安武王所已受之天命此自責之辭養如養癰護疽之

養勸如盤庚篇汝誕勸憂之勸叛者當懲不往誅之
是勸之也坐視其叛而不之懲是養其勸而不救也
兄考喻武王友喻武庚子喻成王民謂為兄考家之
人喻邦君御事此責諸侯之辭

王曰嗚呼肆哉爾庶邦君越爾御事與邦由哲亦惟十
人迪知上帝命越天棗忱爾時罔敢易法矧今天降戾
于周邦惟大艱人誕鄰胥伐于厥室爾亦不知天命不
易予永念曰天惟喪殷若稽夫予曷敢不終朕畝天亦

惟休於前寧人予曷其極卜敢弗于從率寧人有指疆
土矧令卜并吉肆朕誕以爾東征天命不僭卜陳惟若
茲

肆下加哉字亦發語之辭連下至御事句絕明察國
事由於哲人十人即民獻十夫迪知者真知非臆度
知之十人知天命之眷周故來助東征之役天非可
信爾於是無敢改易前人之法奉天命以伐商者武
王之成法改其成法是逆天命也則天將不可信而

命亦改矣況今天降喪禍之戾於周邦故惟興大患
難之人大於隣近之處自相攻伐於其邦君之室此
事不可考疑是康叔不肯從亂而管蔡伐之也今汝
不欲東征是不知天命之不易得而輕弃之也降戾
猶前章降割降威謂武王崩也蓋亦有周之喪禍故
有殷之大艱也天意惟欲亡殷武王既誅紂於始若
稽夫然予曷敢不因武王已墾之田而終其畝乎謂
當誅武庚也天亦惟休眷我武王故伐紂之時卜之

而吉明周當得天下此極吉之卜也予曷敢不從此吉卜而率循保守武王已有所指定之疆土乎何況今日將伐武庚卜之又并吉是天意欲誅武庚也天之命不僭差以下之吉陳說告汝是如此也

康誥

康地名文王之子名封初食采於康武王克商之後分紂故都朝歌以北為邶管叔居之以南為鄘蔡叔居之以東為衛康叔居之管蔡以長

康叔以賢皆以母弟鎮守商地其後紂子武庚
誘管叔以叛惟康叔忠賢阻阨亂人如防制水

殷亂之平康叔有力焉如漢時吳楚七國反得

梁孝王捍其衝七國卒以破亡事勢相類漢書

言周公善康叔不從管蔡之亂是也此篇及酒

誥乃康叔往衛之時武王告之之辭朱子曰孔

氏小序以康誥為成王周公之書而五峰胡氏

以為武王嘗考之其曰朕弟寡兄皆武王之自

言而其他證亦多小序之言不足信蔡氏曰康叔成王叔父不應以弟稱之說者謂周公以成王命誥故曰弟然謂之王若曰則為成王之言周公何遽自以弟稱之也說者又謂寡兄勛為稱武王尤非寡兄自謙之辭苟語他人猶之可也武王康叔之兄家人相語安得以武王為寡兄而告其弟乎且康誥酒誥言文王者非一而略無一語及武王何耶或又謂武王時康叔尚

幼故不得封然康叔武王同母弟武王分封之
時年已九十安有九十之兄同母弟尚幼者乎
又案汲冢周書克殷篇言王即位于社南羣臣
畢從毛叔鄭奉明水衛叔封傅禮召公奭贊采
師尚父牽牲史記亦言康叔布茲與汲冢大同
小異康叔在武王時非幼明矣特序者不知康
誥篇首四十八字為脫簡因誤為成王書也康
誥酒誥篇次當在金縢前

王若曰孟侯朕其弟小子封惟乃丕顯考文王克明德
慎罰不敢侮鰥寡庸庸祗祗威威顯民用肇造我區夏
越我一二邦以脩我西土惟時怙冒聞於上帝帝休天
乃大命文王殪戎殷誕受厥命越厥邦厥民惟時敘乃
寡兄勗肆汝小子封在茲東土

孟長也言為諸侯之長丕顯大明也明德生知而猶
緝熙也慎罰哀矜而不輕用也侮謂忽慢鰥無妻寡
無夫民之窮而無告者且不敢侮則法不輕用於民

可知也庸有常祇敬威可畏重言之猶堯典言安安以庸常敬畏之德顯其民謂導民而使之明也肇始造作區謂分畫界域夏謂華夏岐周猶近西戎文王徙豐始作區宇於華夏之地也一二邦謂隣國也脩謂完治怙恃也冒上進也此言文王初年我西土惟文王是怙其德日盛上聞於天天用休嘉之乃大命文王而三分天下有其二也殪殺也戎殷謂殷之虐民猶寇戎也誕大寡兄武王自謂謙辭東土殷都在

周東也此言滅商而大受天命為天子及所統之國
所有之民無一不得其叙乃汝寡德之兄所勉勗以
繼志述事者也故今日汝得以在此東土而為諸侯
王曰嗚呼封汝念哉今民將在祗暹乃文考紹聞衣德
言往敷求于殷先哲王用保乂民汝丕遠惟商者成人
宅心知訓別求聞由古先哲王用康保民弘于天若德
裕乃身不廢在王命

此以下王曰者二欲康叔明德也念謂不可忽忘將

語辭通述也紹繼也聞衣謂聞而服之於身猶下文
言聞由也往之國也敷求廣求也宅心謂居官之心
如立政所言克厥宅心也訓古訓也弘充廣也裕饒
益也言汝今治民在敬述文王所紹所聞所衣之德
言蓋文王雖生知安行之聖亦聞而知之故孟子曰
由湯至於文王五百有餘歲若文王則聞而知之因
文王之所聞又往敷求殷家先哲王所用以保乂其
民之道以證文王所聞之德言汝大遠惟商之老成

人居官者所知之古訓因商臣之所知又更求知行古昔先哲王所用以康保其民之道以證商臣所知之古訓然未可自足也又當擴充其德與天為一若德足乎已則王之命汝者永不廢矣

王曰嗚呼小子封惇瘝乃身敬哉天畏棗忱民情大可見小人難保往盡乃心無康好逸豫乃其又民我聞曰怨不在大亦不在小惠不惠懋不懋已汝惟小子乃服惟弘王應保殷民亦惟助王宅天命作新民

恫痛瘝病戒慎恐懼常若病痛之在身則無所不敬
矣畏威通棐朱子從顏氏漢書註與匪同後並倣此
忱信也天之威非可信其常佑助民之情大可見者
小人難保其常懷服也然天之視聽自民民情所向
即天所佑民情所背即天所弃汝往就國當盡汝之
心毋自安而好逸豫乃可以治民又申言小人難保
之意我聞人有言曰凡民不當使之有怨怨無大小
皆能為患不在大者大起於小不在小者小至於大

汝之德雖已惠愛於人猶自以為不惠雖已懋勉於
已猶自以為不懋歟然不自足惟恐失民之心如此
庶可使民無怨也應謂順其心宅謂已得天命而居
守之也作謂振起而變化之也新民殷民之新附者
汝所服行惟弘廣王之所以應保殷民者亦惟佐助
王之所以守天命而動化其新民者

王曰嗚呼封敬明乃罰人有小罪非青乃惟終自作不
典式爾有厥罪小乃不可不殺乃有大罪非終乃惟青

災適爾既道極厥辜時乃不可殺

此以下王曰者六欲康叔慎罰也敬則慎重所以能明小大猶言輕重者謂誤犯終謂故犯典式謂以常法為法式也自作不典式謂自為不法之事者災謂因過誤而罹災禍適爾適然如此也蘓氏曰此設為死罪之大小以明其情之有輕重非謂小罪為可殺也如甲乙皆有死罪而甲之罪小於乙非謂其罪不至死也今世之法謀殺已傷雖未殺皆死雖未傷而

寘人於必死之地亦死過失殺雖已殺皆贖與此意略相似

王曰嗚呼封有敘時乃大明服惟民其勅懋和若有疾惟民其畢棄咎若保赤子惟民其康乂

有敘謂刑罰中倫皆得其宜是汝能大明而有以服民也明不可欺而民畏服其必勅正懋勉不敢乖戾以犯法然此特道之以政而已故民之和者勉強為之若有疾若保赤子道之以德也止民之惡者如去

己之疾則調護無所不至民必遠罪而盡棄其咎矣
保民之善者如保己之赤子則愛養無所不至民必
遷善而底於康乂矣先言有疾後言赤子蓋民棄咎
而後可康乂也

非汝封刑人殺人無或刑人殺人非汝封又曰劓刑人
無或劓刑人

非汝封刑此人殺此人則無或敢有刑人殺人者非
汝封又言當劓此人則此人則無或敢有劓刑人者

言用刑之權惟汝得專不可輕用也刑殺刑之重者
劓則刑之輕者刑人之刑輕於殺重於劓則蓋指荆
宮二刑而言也孔疏曰此又曰述康叔之文曰下章
倣此

王曰外事汝陳時臬司師茲殷罰有倫又曰要囚服念
五六日至於旬時丕蔽要囚

外事謂都邑之事天子地方千里六鄉六遂在方四
百里內者為國中公邑家邑小都大都在方四百里

外者為野諸侯大國地方百里方四十里內為國中
其外為野次國地方七十里小國地方五十里方三
十里內為國中其外為野野之獄訟各有大夫士自
治其事不屬國中故曰外事蓋如魯之費郈楚之申
息齊之平陸靈丘也臬法也立木為射之的故謂法
為臬都邑之事在司之者得其人汝陳列任法之司
使之師此殷罰之有倫理者殷法乃殷民所習知故
師之以治殷民言罰不言刑舉其輕者言也要謂詰

罪之辭囚謂拘繫之人汝又與有司言及罪已詰定
明徵其辭而囚繫其人以待決斷者當服着於心而
思念之五六日至十日至三月詳察審覆情理無差
則上其獄而不斷此要囚之人也案周官鄉遂之外
縣野有縣士都家有方士掌王城二百里以外至五
百里之獄訟各辯其罪而要之或二旬或三旬或三
月而上其獄於國司寇聽之蓋與此詰之意相似
王曰汝陳時臬事罰蔽殷彝用其義刑義殺勿庸以次

汝封乃汝盡遜曰時敘惟曰未有遜事

此言國中康叔自決之事汝陳列用法之事其輕而當罰則斷以殷家之常法其重而當刑當殺則擇用殷法之合於宜者不可移就汝之意此刑字兼墨劓剕宮次猶次舍之次汝所用之法盡遜順於理曰是有敘矣惟當曰未有遜順之事蓋道民以德刑措不用乃為極治法之當未足言也

已汝惟小子未其有若汝封之心朕心朕德惟乃知

已者畢前起後之辭汝雖年小他人未有能若汝之心者至於我之心我之德惟期於無刑亦惟汝能知之也

王曰封以厥庶民暨厥臣達大家以厥臣達王惟邦君汝若恒越曰我有師師司徒司馬司空尹旅曰予罔厲殺人亦厥君先敬勞肆徂厥敬勞肆往姦宄殺人歷人宥肆亦見厥君事戕敗人宥

達通也惟猶與也越助語辭我我康叔也尹謂大夫

旅謂衆士予予司徒司馬司空等也厲虐害之也勞
慰安之也歷經也過也謂挺刃及其身傷而未死者
也戕殺人也敗歷人者也宥當服重刑而從輕者
也前一節武王言我之心欲用德不用刑惟汝能知
之此承前節之意而言上下貴賤皆當使其心通達
為一而相知以庶人之為民及士之為臣者通達於
卿大夫之家欲其皆知大家之心以卿大夫之為臣
者通達於王與邦君欲其皆知王與國君之心汝若

於恒時而曰我之卿大夫士言曰予罔或厲人殺人
蓋素知其君之心不欲厲人殺人也臣之罔厲殺人
者亦其君先敬於慰安其民故其臣所徂往皆敬於
慰安其民而不厲之也臣之罔殺人者所往有為姦
宄殺人傷人而情理可憫猶或宥而不殺之亦見其
君所行之事於殺人傷人者亦或宥之也此一節舊
本錯在梓材篇首

凡民自得罪寇攘姦宄殺越人于貨啓不畏死罔弗孳

凡民句絕言凡人之情皆如此也自得罪猶上言自作不典式太甲自作孽之自謂其得罪皆由己稔惡非因人致災也越人猶顛越人即上文歷人敗人孔疏謂不死而傷是也于貨謂所以殺傷人者于其貨也瞽昏愚強暴也慙惡也凡人之情於怙終為惡寇攘之姦宄甚至殺人而取其貨強悍不畏死者無不惡之孟子引此凡民二字在罔弗慙上語意尤明上文言戕殺敗歷之姦宄亦或有時宥之蓋其情

理之可憫者耳若此自得罪不畏死之姦宄凡民罔
不惡之則必刑必殺而不可宥孟子所謂不待教而
誅者也

王曰封元惡大慙矧惟不孝不友子弗祗服厥父事大
傷厥考心于父不能字厥子乃疾厥子于弟弗念天顯
乃弗克恭厥兄兄亦不念鞠子哀大不友于弟惟弔茲
不于我政人得罪天惟與我民彝大泯亂曰乃其速由
文王作罰刑茲無赦

元惡殺越人于貨者也。大憝凡民罔不憝也。善父母為孝。善兄弟為友。不孝總言父子失道。不友總言兄弟失道。下乃分言之也。字撫愛也。天顯長幼之分。乃天之顯道也。鞠子幼而未離鞠養之子也。哀矜憐也。弔至也。上文所指元惡人所大惡也。況於不孝不友之人。父因子之不孝。遂不慈其子。兄因弟之不恭。遂不友其弟。其數倫悖理至此。豈不於我為政之人而得罪乎。天所與斯民之常理。大泯絕紊亂矣。然則如

之何哉汝其曰速由文王所作之罰刑以罰之刑之而於此無所赦乎蓋不可也

不率大憂矧惟外庶子訓人惟厥正人越小臣諸節乃別播敷造民大譽弗念弗庸瘵厥君時乃引惡惟朕慈已汝乃其速由茲義率殺

不率不孝不友者也憂擊也大憂謂罰之刑之而不赦也外謂都邑之官也庶子卿大夫士之庶子為士者訓人猶周官土訓誦訓訓方氏之類多見聞能道

說古今遠近之事者正人如周官宮正酒正之類為
一官之長者諸節如符節璽節旌節之類小臣持以
出入者引猶引弓之引言滿盈其惡義謂君臣之義
上文所指一家父子兄弟之不率且欲大治之也況
於不令之臣哉夫為臣者當承宣君之政教令則別
有所播揚敷布以造大譽於民間亂政改作違道干
譽弗念弗用其君之命以病其君是乃長惡之人為
上之人所惡然則如之何哉汝乃其速用此君臣之

義律之而率皆殺之乎蓋不可也

亦惟君惟長不能厥家人越厥小臣外正惟威惟虐大
放王命乃非德用又汝亦罔不克敬典乃由裕民惟文
王之敬忌乃裕民曰我惟有及則予一人以懌

君長謂康叔也能如柔遠能邇之能謂化誨而和順
之意也家人謂父子兄弟一家之人小臣即小臣諸
節外正即外庶子訓人正人也舉其長以包其次也
威虐謂無赦率殺也放廢棄也典謂五典父子之親

兄弟之序君臣之義在乎以身先之有不孝不友之
民弗念弗庸之臣者亦是汝為君為長不以德化順
彼一家之人與此小臣外正之官乃惟用威虐以刑
殺之是大廢棄王命而非以德為治矣王之命欲以
德又汝不用德而用威虐廢棄王命也汝亦無不敬
行五典以道其民汝所以裕其民者惟當用文王
敬畏之德汝之裕民曰我惟求有以及於文王則我
之所喜也

王曰封爽惟民迪吉康我時其惟殷先哲王德用康又民作求矧令民罔迪不適不迪則罔政在厥邦

武王既戒康叔矣又自責於身爽明也明知斯民導迪之則吉康我欲迪民於是惟殷先哲王之德所用以安治其民者起而求也況今殷民無以迪之則不能自適於吉康之地不迪其民則非惟民陷於凶危而我國亦無政矣

王曰封予惟不可不監告汝德之說于罰之行令惟民

不靜未戾厥心迪屢未同爽惟天其罰殛我我其不怨
惟厥罪無在大亦無在多矧曰其尚顯聞於天

我惟不可不監視於古告汝以德之說于罰之行蓋
德者本也告汝以罰之行必本於德之說所謂德者
即上文求殷先哲王以康乂民之德是也戾定也今
殷民不安靜未定其心道迪之屢屢矣猶未齊同此
皆我道民之德未至也不能奉天作君師之意天其
降罰而殛我我不敢怨天我之罪無在於大亦無在

於多雖小寡亦不可矧至於章顯而上聞於天為天
所罰殛則罪大且多矣尚何敢怨乎此亦王自責以
傲康叔

王曰嗚呼封敬哉無作怨勿用非謀非彞蔽時忱丕則
敏德用康乃心顧乃德遠乃猷裕乃以民寧不汝瑕殄
戒康叔敬而無忽無作致怨於民之事非善謀非常
道者勿用惟斷以是心之誠大則在於敏脩其德誠
則揆諸心而安顧謂常自在之敏則不怠是以能顧

非謀非彘馘之不遠者能饒益其民民乃底於寧而
我不暇疵絕汝矣

王曰嗚呼肆汝小子封惟命不于常汝念哉無我殄享
明乃服命高乃聽用康乂民

命謂命為諸侯之命不于常謂不可常保殄享謂失
國而絕朝享天子之禮當明汝所服之王命謂不可
昏忘也高汝所聽謂當聽我所告文考及先哲王之
道不可卑污也

王若曰往哉封勿替敬典聽朕告汝乃以殷民世享
五典者率性之道汝敬而行之勿或失墜聽我告汝
之言乃以殷民世世為國君而享於天子矣

酒誥

商紂醜酒其下化之康叔封於紂都就封之時
武王有誥之之辭載之康誥之篇矣又特誥之
以此俾往妹土教戒其臣民勿湏於酒而別為
酒誥之篇

王若曰明大命於妹邦

命教戒之辭也妹地名紂所都言康叔今既往封當
明示大教命於彼妹邦之臣民俾勿湏於酒也

乃穆考文王肇國在西土厥誥庶邦庶士越少正御
事朝夕曰祀茲酒

文王廟次為穆故稱穆考告勅之使敬謹故曰誥庶
庶邦諸侯之君文王為西伯故告戒庶邦庶士上中
下士少正大夫御事治事之卿皆文王之臣也告戒

他國衆君本國羣臣於朝夕之間曰惟祭祀得用此酒武王將欲康叔往東土告戒其臣民故先言文王在西土亦如此告戒令康叔法之也

惟天降命肇我民惟元祀天降威我民用大亂喪德亦罔非酒惟行越小大邦用喪亦罔非酒惟辜

天降命謂天降此教命於人威猶禍也禍之可畏者也武王既述文王昔者之告戒遂自言曰如今我民作酒惟用之於大祭祀是天以此教人也既有此酒

之後飲者至於沈縱有身者有酗酒之行則大荒亂而喪失其德有國者有酗酒之罪則非但喪失其德并喪亡其邦凡民之喪德君之喪邦皆因於酒是天以此禍人也

文王誥教小子有正有事無彝酒越庶國飲惟祀德將無醉

小子者庶民之子孫有正即少正有事即御事不言庶士省文上既總言文王之誥故此又分言文王誥

教本國之民臣無得常飲酒必因事而後飲及誥教
他國諸侯之君惟祀乃飲其飲以德將之無至於醉
惟曰我民迪小子惟土物愛厥心臧聰聽祖考之彛訓
越小大德小子惟一妹土嗣爾股肱純其藝黍稷奔走
事厥考厥長肇牽車牛遠服賈用孝養厥父母厥父母
慶自洗腆致用酒

此武王授康叔以往妹邦告民之辭今汝之往惟當
言曰為我之民者各導迪其子孫務本力農惟土地

所生之物是愛不為外慕所誘則其心臧善能聰聽
祖考彝常之教及其小大之德小大德謂所行之善
或小或大純語辭為民之小子者惟專一其心於妹
土之地繼爾民股肱之力其種藝黍稷竭力代父兄
之勞農隙之時始遠役賈買賣易貨物用以孝養其
父母至父母當慶為子者乃自盥洗以示潔敬極其
腆厚致用酒以奉親豳風所謂為此春酒以介眉壽
是也

庶士有正越庶伯君子其爾典聽朕教爾大克羞者惟君爾乃飲食醉飽丕惟曰爾克永觀省作稽中德爾尚克羞饋祀爾乃自介用逸茲乃允惟王正事之臣茲亦惟天若元德永不忘在王家

此武王授康叔以往妹邦誥臣之辭庶士有正越庶伯君子與篇首所稱庶士少正御事同有正即少正庶伯君子衆官之長即御事也爾康叔與其臣也爾臣常主於聽我之教戒必不以酒廢事凡燕享祭祀

之禮皆有俎有羞先進俎後進羞羞者惟國養耆老
之時爾大能進羞於老者侍君燕飲之時爾大能進
羞於君此時爾乃可因而飲酒以醉食肉以飽若非
養老侍燕則不得飲也又有大於典聽朕教者爾能
自脩其德也惟曰爾能永遠監觀省察動作有稽欲
其德無過不及必不以酒喪德惟祭祀之時爾尚能
進羞以饋祀祖考此時爾乃可因而飲酒自介景福
用以逸樂若非祭祀祖考則不得飲也如此乃真可

為王家有正有事之臣如此天亦佑助爾之大德在
王家亦永遠不忘爾也非止為一國之賢臣而已

王曰封我西土棊徂邦君御事小子尚克用文王教不
腆于酒故我至於今克受殷之命

徂往也御事之下不言少正庶士以大統小也文王
昔為西土之君常教戒其臣民文王既終西土非往
日之邦君矣而臣民猶能遵用文王之遺教不敢腆
於酒文王德教盛行永久不替天所佑助故我用至

於今日遂能受殷之命而有天下也

王曰封我聞惟曰在昔殷先哲王迪畏天顯小民經德秉哲自成湯咸至于帝乙成王畏相惟御事厥棗有恭不敢自暇自逸矧曰其敢崇飲

殷先哲王謂湯迪畏猶言實畏天顯天道之顯明經常秉持哲者德之明也成王守成之王畏相敬畏之相相謂輔弼師保在王左右者也棗有恭猶內則言不有敬事崇猶崇酒之崇過飲而崇足也言湯畏天

畏民明德日新自湯以後之成王畏相及治事之卿大夫雖平居燕息之時非有所恭敬之事猶且憂勤不敢自閒暇逸樂況敢過飲乎

越在外服侯甸男衛邦伯越在內服百僚庶尹惟亞惟服宗工越百姓里居罔敢湏于酒不惟不敢亦不暇惟助成王德顯越尹人祇辟

外服邦國之諸侯侯甸男衛舉四服以包其餘邦伯邦君及其州牧也內服都鄙之臣百僚庶尹都鄙之

庶士周官所謂殷也亞都鄙之大夫周官所謂伍也
服都鄙服官政之卿周官所謂兩也宗工王朝公卿
大夫及王子弟之食采邑為大宗者都鄙之長也百
姓里居民之居於閭里者尹人邦國都鄙之尹其民
者辟法也承上文言不止殷王與公卿大夫不敢崇
飲外而邦國諸侯內而都鄙羣臣下而閭里百姓皆
無敢湏於酒者臣勤其職民勤其業亦無暇於飲也
為臣但知助成王之明德為民但知助尹人之祗敬

奉法而已

我聞亦惟曰在今後嗣王酣身厥命罔顯于民祇保越
怨不易誕惟厥縱淫泆于非彝用燕喪威儀民罔不盡
傷心惟荒腆于酒不惟自息乃逸厥心疾狠不克畏死
辜在高邑越殷國滅無懼弗惟德馨香祀登聞于天誕
惟民怨庶羣自酒腥聞在上故天降喪于殷罔愛于殷
惟逸天非虐惟民自速辜

亦惟曰繼上文惟曰而言後嗣王紂也酣身酣酒於

身也言其命令之出無能明於民之當祇保及民怨
之不易弭縱恣意也淫沈溺也佚放失也燕褻慢也
盡痛意息止也大惟其縱意以淫佚於非彝用燕喪
其威儀民無不盡然傷心悼其將亡者紂惟荒亂腆
厚於酒更不自止息乃肆為逸豫商邑王畿千里之
內殷國天下諸侯之國懼憂也其心忿疾狠戾不克
畏死其罪積聚在商邑及殷之侯國得罪於畿內之
民天下之民雖至於滅亡而不以為憂德馨香祀以

德之馨香祀神也民怨庶羣自酒謂民所以怨皆紂
與其羣臣自酒而召怨也天不聞其以德感格於神
之馨香但聞其與羣臣自酒召怨於民之腥穢天降
喪而不愛之者惟以其逸豫故也蓋天非虐惟民自
速其罪民猶人指紂而言速召也

王曰封子不惟若茲多誥古人有言曰人無於水監當
於民監今惟殷隆厥命我其可不大監撫于時

撫猶以手案循而視之也我不惟如此多誥所以詳

言湯及紂之事者蓋以古人有言謂人無於水而監水能見形之妍醜而已當於人而監則其得失興亡可知今殷人自速辜既墜命矣我其可不大監視於是乎

予惟曰汝劼慙殷獻臣侯甸男衛矧太史友內史友越獻臣百宗工矧惟爾事服休服采矧惟若疇圻父薄違農父若保宏父定辟矧汝剛制于酒

劼慙勤力戒勅而使敬畏也獻臣侯甸男衛之賢臣

封為諸侯者當時侯國多承殷之舊也案周官太史掌邦之六典八法八則內史掌王之八柄之法此太史友內史友乃殷時太史內史之官廢居紂都康叔與為賓友者獻臣百宗工皆殷賢臣之不仕者爾事服事於爾者大夫也服休職之優閑者服采職之繁劇者若疇汝之疇類三卿也圻父司馬薄迫也司馬掌封圻薄伐愆違農父司徒也司徒掌農事順保萬民宏父司空也宏宮室之宏司空定度地居民之法

故曰定辟矧汝句絕先劫必殷民之為諸侯者次及
殷臣之為賓友不仕者然後及康叔之臣自卑而尊
然後及康叔之身而總戒之曰凡殷之臣及汝之臣
及汝之身皆當剛制於酒

厥或誥曰羣飲汝勿佚盡執拘以歸於周予其殺又惟
殷之迪諸臣百工乃湏于酒勿庸殺之姑惟教之有斯
明享乃不用我教辭惟我一人弗恤弗蠲乃事時同于
殺

誥告字通用飲不羣則不久亦未至於荒敗惟羣飲
則醜矣周京師也其者未定之辭諸臣衆臣官之卑
者工宗工官之尊者蠲除也其或有人告汝之臣羣
聚飲酒汝勿縱失盡執拘以歸於京師予當詳其罪
可殺者殺之若殷家所迪之衆臣及宗工酒酒者予
勿用殺之姑惟教之其有從斯教者則褒顯之使明
享其報以示勸乃或不用我教辭不恤我一人不蠲
除其酒酒之事是則同於殺前兼戒民臣至此則畧

於民而獨詳於臣者蓋臣者民之師表臣正則民正
矣

王曰封汝典聽朕必勿辯乃司民酒于酒

辯使也汝常主聽我誥必之言勿使爾司民之官酒
於酒

梓材

案召誥言甲子周公乃朝用書命庶殷侯甸男
邦伯疑此篇即其命侯甸男邦伯之書也召誥

召公率諸侯陳幣而有進戒之辭蓋所以答此
篇之意故此篇列於召誥之前若其命庶殷之
書則多士是也列於洛誥之後者蓋周公獻卜
之事在命庶殷之先也吳氏曰此書設諭者三
不於其先其次取之而獨取其後梓材名篇不
可考矣

惟三月哉生魄周公初基作新大邑于東國洛四方民
大和會侯甸男邦采衛百工播民和見士于周周公咸

勤乃洪大誥治

哉生魄望後也基始營作四方民諸侯各以其國之
民來赴役者也營築勞事民之至者乃大和猶文王
作靈臺而庶民子來也會五服諸侯以時見之禮相
見也周制侯甸男邦采衛蠻夷鎮藩九服獨舉上五
服者以蠻夷鎮藩皆夷狄也男下有邦字以男居五
服之中舉中則五服皆有邦可知百工周公官屬播
鼓動之意見猶論語從者見之之見士諸侯之士率

其民者也勤謂勞撫之成王七年三月望後周公新作洛邑而赴役之民皆大悅周公於是會禮見五服諸侯百工又因民之悅而鼓動之雖士之微亦使得見而周公曰日撫勞之因大誥以王居洛邑治民之意也舊本此一節誤在康誥篇首而康誥內一節誤冠此篇之首蓋互錯一簡也蘇氏移此一簡於洛誥篇首者非是蓋與彼文意不相聯貫又詳彼處即無缺簡不待補也惟吳氏說得之今附見篇末

王啟監厥亂為民曰無胥戕無胥虐至于敬寡至于屬婦合由以容王其效邦君越御事厥命曷以引養引恬自古王若茲監罔攸辟

此以下疑即周公告侯甸男邦采衛之辭然文闕不可復考存者亦顛倒失次今姑據其存者略為敘正而釋其義啟開監侯國也敬當作矜與鰥同屬對長而言謂其子弟婦對夫而言謂長與屬之妻辟偏邪也謂王之所以開置監國為治民也其命監之意蓋

曰無相與戕殺虐害其民雖至於鰥寡窮民及其家
之屬與婦皆合聚由是以容蓄之王之所以責效侯
國之君及其御事之臣者其命何以哉惟欲引長斯
民生養安恬之道而已自古王者皆如此故其所立
之監皆能遵上意而無有偏邪也

皇天既付中國民越厥疆土于先王今王惟曰先王既
勤用明德懷為夾庶邦享作兄弟方來亦既用明德后
式典集庶邦丕享

先王文王武王也皇天既付與中國之民及其疆土
於先王今王之意惟曰先王既勤於用其明德以懷
撫為已夾輔之諸侯俾庶方之來享者皆作而起兄
弟之國方方而來矣亦既用其明德能使羣后之式
用典章者皆聚集而庶邦無不來享者矣享言同姓
之國丕享并言異姓之國

肆王惟德用和懌先後迷民用懌先王受命惟曰若稽
田既勤敷菑惟其陳脩為厥疆畎若作室家既勤垣墉

惟其塗墍茨若作梓材既勤樸斷惟其塗丹墍


迷民商之頑民也先謂紂之民後謂紂之遺民復與
武庚為亂者故曰先後迷民先王受命謂先王受天
所命之民也言今王但當如先王之用其明德以和
悅商家先後之迷民又用以慰悅周家先王之受命
民也迷民專指殷民遷洛者而言受命汎指四方諸
國之民而言稽治敷廣菑去草棘陳列脩治疆畔
畎通水渠也墍仰泥茨蓋也梓良材可為器樸粗治

之也斲精治之也丹赤石矐采色之名言先王用德以懷諸侯已如稽田之敷菑作室家之垣墉作梓材之撲斲矣今惟當用德以成其終如陳脩而為驢馱塗之以墜而茨之塗之以丹而矐之也故宅洛邑土中以賓四方諸侯者蓋為此耳

已若茲監惟曰欲至于萬年惟王子子孫孫永保民若茲言如上文所云也諸侯之君自今以往咸願周之王業至於萬年之久俾王之子子孫孫長保其民

而已吳氏曰此篇庶邦享作兄弟方來庶邦丕享之類與四方民大和會侯甸男邦采衛百工播民和見士於周之意若相始終王啟監以後若洛邑初成諸侯畢至之時周公進戒之辭曰中國民亦謂徙居於洛在天地之中也其曰若稽田作室家作梓材皆為作洛而言欲其克終也

書纂言卷四之二



覆校官編修臣張秉愚

校對官檢討臣龔大萬

騰錄監生臣萬宣

欽定四庫全書薈要

經部

書纂言卷四之三

詳校官祭酒臣
韋謙恒



書纂言卷四之三

元 吳澄 撰

召誥

春秋左氏傳曰武王克商遷九鼎於洛邑史記載武王之言曰我南望三塗北望岳鄙顧瞻有河粵瞻洛伊毋遠天室營周居於洛邑然則武王固欲宅洛矣周公相成王成武王之志此時召公先至經始周公繼至成終庶殷之民舊遷



在洛者諸侯之民新來赴役者同力輸作營洛

功畢周公歸鎬而召公率諸侯作書致誥以荅

周公甲子誥治之辭并以告庶殷御事俾與聞

之所謂公事公言之也而因周公之歸以達於

王召公所誥故曰召誥蔡氏曰其書拳拳於歷

年之久近反復乎夏商之廢興以誠小民為祈

天命之本疾敬德為誠小民之本一篇之中屢

致意焉古之大臣其為國家長遠慮蓋如此

惟二月既望越六日乙未王朝步自周則至于豐惟太保先周公相宅

二月成王十七年之二月日月相望為之望或十五日或十六日或十四日既望望後一日也若十六日既望則乙未二十一日也周鎬京也豐去鎬二十五里文武廟在焉王至豐以宅洛之事告廟也太保召公也告廟召公乃先周公往洛以相宅

越若來三月惟丙午朏越三日戊申太保朝至於洛卜

宅厥既得卜則經營

越若發語辭來猶來年來日之來承上二月而言故云來三月丙午三月三日也月三日明生始出西方謂之朏戊申五日也卜宅用龜卜宅都之地也得卜卜而吉也經營規度城郭塗巷廟社朝市寢室之位也

越三日庚戌太保乃以庶殷攻位于洛汭越五日甲寅位成

庚戌七日也庶殷殷之衆紂都之民遷在洛者就役之也政治也甲寅十一日也位成左祖右社前朝後市等位置已定也召公之攻位但用殷民不用周民何也蓋洛邑畿內之民不征其力諸侯四方之民又未至洛惟殷民遷在洛者可役而攻位之功力亦省且易故也

若翼日乙卯周公朝至于洛則遠觀于新邑營越三日丁巳用牲于郊牛二越翼日戊午乃社于新邑牛一羊

一豕一

若發語辭翼在身旁故在旁之日謂之翼甲寅之次
日乙卯也達觀徧觀也召公已成位周公至則徧觀
新邑所營之位丁巳十四日用牲于郊祭告天也郊
用特牲配以后稷故牛二戊午十五日社於新邑祭
告地也祭社用太牢故牛羊豕各一此蓋就洛邑新
立之郊社為成王告作洛於天地而周公攝行其事
告畢然後興功也不告先王者王已在豐告廟矣於

時洛邑宗廟未成故至十二月始祗祭宗廟也遣使告卜於王疑在祭告天地之後

越七日甲子周公乃朝用書命庶殷侯甸男邦伯厥既命殷庶庶殷丕作

甲子二十一日也用書命庶殷者多士之書是也命侯甸男邦伯者梓材之書是也梓材言五服此言三服者省文互見也伯州牧也庶邦冢君咸在而統於伯也丕作言皆趨事赴功也殷之冢民且樂於効力

周之友民可知矣悅以使民民忘其勞其斯之謂與
或問至此始言庶殷丕作何也曰周公未至洛之前
召公以庶殷攻位用其力者五日矣及周公至洛而
諸侯之民皆至考之前篇自哉生魄而基作凡治城
郭宮室蓋四方太和之民少休殷民之力至此亦已
五日故於其朝用書命殷庶既命而遂丕作自是之
後在洛之民與四方之民同輸力役以至於畢功其
勞逸之均也如此

太保乃以庶邦冢君出取幣乃復入錫周公

作洛功成周公將歸宗周召公與庶邦君咸在公所
出謂自公所出外復入謂自外入至公所也錫與也
召公率諸侯出而取幣復入而與周公因公歸以獻
於王蓋以慶洛邑之成也

曰拜手稽首旅王若公

此召公與庶邦冢君言也旅陳也猶庭實旅百之旅
蓋贊之拜送幣而陳獻於王與公也

誥告庶殷越自乃御事

此召公與殷之長民者言也御事商之舊臣長其民而
同遷於洛者此篇召公陳戒之辭蓋與庶邦君同辭以答前日
周公命書之意因公歸以達於王而俾遷洛之殷人與聞之故曰
誥告庶殷越自乃御事謂告殷民而又自其長以達於民也

嗚呼皇天上帝改厥元子茲大國殷之命惟王受命無疆
惟休亦無疆惟恤嗚呼曷其奈何弗敬

此以下皆召公與周公言而以告王也殷紂嗣天位為元子殷大國也元子非可廢大國未易亡而天改其命矣我周王今受其命此莫大之美亦莫大之憂也故嘆而言曰曷其奈何弗敬乎甚言不可以不敬也此篇專主敬字而言敬則此心常存動循乎理我不違天而天亦不違我矣所以能保有天命也

天既遐終大邦殷之命茲殷多先哲王在天越厥後王後民茲服厥命厥終智藏瘝在夫知保抱攜持厥婦子

以哀籲天祖厥亡出執嗚呼天亦哀于四方民其眷命
用懋王其疾敬德

遐遠也終絕也後王謂紂後民紂之民也後王服天
命以有其民後民服天命以戴其君厥終紂之末年
也疾猶速也殷亡十有餘年天既久絕其命矣殷先
世多有哲王歿而精神在天子孫宜若可恃其佑助
而紂之末年賢智隱藏惟病民者在位民困虐政保
抱扶持其妻子哀號呼天逃亡而出則又往其亡出

之地拘執之無地可容故天亦哀此民而眷命其用
懋德者以代殷此周文武所以興也天命惟歸於德
今王其可以不疾敬德乎

相古先民有夏天迪從子保面稽天若今時既陞厥命
今相有殷天迪格保面稽天若今時既陞厥命

夏去周之時已遠故曰相古先民天迪從子保謂夏
為天所開導從其傳與子而保佑之面稽天若謂所
向能考知天意之如此也殷去周之時為近故曰今

相天迪格保謂殷為天所開導使之格正夏罪而保佑之禹湯受天眷命不違天意而其後皆隆厥命見天命之無常也

今沖子嗣則無遺壽者曰其稽我古人之德矧曰其有能稽謀自天

遺棄壽者有年壽之老人古人之德如禹湯之敬德稽謀自天謂所謀能考天意如禹湯之面稽天若蓋老成之人既能知古又能知天所當親信也

嗚呼有王雖小元子哉其不能誠于小民今休王不敢
後用顧畏于民若

其者期之之辭誠和也後猶後獲後義之後顧回視
也若險也言王雖幼冲乃天之元子年雖幼任則大
也其大能和於小民在令可以為休美乎王於令時
有不敢後者民心無常有如若險所當回顧而惕畏
也

王來紹上帝自服于土中旦曰其作大邑其自時配皇

天陟祀于上下其自時中又王厥有成命治民今休王先服殷御事比介于我有周御事節性惟日其邁

來來洛邑也周公歸告洛邑之成王將自來行祭祀朝會之禮也紹上帝代天而繼其志也服行事也土中洛邑居四方之中也旦者君前臣名召公告王故稱周公名也成命天命定而不改也先猶先難後獲之先服化服之比親也介猶賓介之介節裁抑之也性氣質之性邁行而進也王來洛邑將繼天而自

行事於土中周公曰其作大邑於洛其可自是對乎
天以主上下之百神而必祀其可自是宅乎地中以
臨四方之諸侯而為治洛邑既成王其有天之成命
於此治民在今可以為休美乎王於今時尤有所當
先者商之舊臣已遷於洛正欲化服其心使之親近
我周之臣薰染變化以矯揉其性之偏而日進於善
也

王敬作所不可不敬德

此一句起下三節謂王當以敬而為其所不可不敬其德

我不可不監于有夏亦不可不監于有殷我不敢知曰有夏服天命惟有歷年我不敢知曰不其延惟不敬厥德乃早墜厥命我不敢知曰有殷受天命惟有歷年我不敢知曰不其延惟不敬厥德乃早墜厥命

在我不可不監視夏殷之興亡歷年長短在乎天者也我皆不敢知敬德在乎人者也惟不敬德乃早墜

命我所知者此耳夏商歷年不為不久召公以為早
陸命蓋欲王永命於無窮也

今王嗣受厥命我亦惟茲二國命嗣若功

今王繼夏殷而受其命在此亦惟以此二國之命而
繼其功功謂能敬德而有歷年者不可如其後王之
不敬而陸命者也

王乃初服嗚呼若生子罔不在厥初生自貽哲命今天
其命哲命吉凶命歷年知今我初服宅新邑肆惟王其

疾敬德

貽遺也哲命以哲而為天所命也王今日來宅新邑
乃行事之初譬如生子者在其初生之時服習正事
則膺受福祿是命雖在天而以哲獲命則此命乃自
己所貽也今日天之所命其亦命其哲者敬德哲也
不敬德非哲也故所命或吉或凶歷年或長或短知
皆在今我初來行事於宅新邑之時敬德則命以吉
而年永不敬德則命以凶而年不永故王惟當疾敬

德也肆惟王其疾敬德一語通結上三節與王敬作所不可不敬德一語相終始

王其德之用祈天永命

此一句起下三節祈求也天命視人心而為去留王用德不用刑則民懷其德而天命永矣雖非有所祈於天然以用德而永命有若祈而得之也

其惟王勿以小民淫用非彝亦敢殄戮用乂民若有功非彝猶曰非法勿以小民犯法之故我亦敢於用嚴

刑以治之而有功有功謂能勝奸宄也

其惟王位在德元小民乃惟刑用于天下越王顯上下
勤恤

元首也衆體之長也顯明德也上下羣臣有上有下
也勤謂勞心恤謂恤刑王之位居民上如元首之於
身然不以位長民惟在以德長民故言其惟王之位
在於德之元小民而已王德之元小民猶天德之首
庶物也乃惟刑用見先德後刑有不得已而用之意

刑之不得已而用於天下及王之惟務明德不欲用
刑者羣臣奉承此意故若上若下皆勤意於恤刑而
不輕用也勤恤猶帝典言欽哉欽哉惟刑之恤

其曰我受天命丕若有夏歷年式勿替有殷歷年欲王
以小民受天永命

其曰者所期如此夏歷年踰四百丕若者期於過之
殷歷年踰六百式勿替者期於及之也欲王以小民
受天永命一語通結上三節與王其德之用祈天永

命一語相始終

拜手稽首

此四字召公又贊庶邦君同拜也

曰予小臣敢以王之讎民百君子越友民保受王威命
明德

既拜復更端而言予小臣召公暨庶邦君也讎民殷
民也百君子殷之御事也友民周民也保猶五家為
比使之相保之保威命猶言嚴命即命庶殷侯甸男

邦伯之命也明德謂王敬德以愛民而祈天者也

王末有成命王亦顯我非敢勤惟恭敬奉幣用供王能祈
天永命

王於終有成命之時亦顯其德蓋謹始如終不以命
既有成而怠於德也我召公庶邦君自我也若我衆
臣則非敢曰能勤也惟恭敬奉進幣帛用以供給王
期王之能祈天永命而已王末有成命因上文王厥
有成命而言顯字勤字因上文越王顯上下勤恤而

言恭奉幣因上文取幣旅王若公而言能祈天永命亦因上文而言以結一篇之意

洛誥

成王在洛烝祭命周公留後治洛作冊以誥周公故名洛誥而篇首先記周公在洛遣使告卜之事次記成王在洛與周公問荅之辭所以具事之始終也

周公拜手稽首曰朕復子明辟

拜手稽首者記周公遣使之禮曰者周公授使者以告王之辭復猶復逆之復反也報也王命周公營洛遣使反報於王也子親之之辭明辟尊之之辭周公于成王親則兄之子尊則君也故稱之曰子明辟王如弗敢及天基命定命予乃膺保大相東土其基作民明辟予惟乙卯朝至于洛師

及猶言與也基謂創始定謂成終于此新作都邑為基命從此久安長治為定命宅洛所以基命定命也

王宜親行而王以幼冲執謙退讓若不敢與知大事
然于是周公乃繼召公而往相視洛邑庶幾為王肇
始作民明辟之地而周公以二月十二日乙卯之朝
至于洛也洛邑在鎬東故曰東土洛師猶曰京師師
衆也言可以居衆也

我卜河朔黎水我乃卜澗水東澠水西惟洛食我又卜
澠水東亦惟洛食佯來以圖及獻卜

我者謂國家也卜宅乃國家之事非已所敢專故曰

我卜召公以二月五日戊申至洛卜宅是也召公既卜宅定位位成周公始至徧觀畢然後遣使以復于王也河朔黎水漢時河北黎陽也澗水東澗水西東都王城也漢時河南縣澗水東下都成周也漢時洛陽縣食者龜兆食墨占之吉也薛氏曰食者墨與龜相茹入今卜兆先揚火而後致墨既坼而墨加之則大小微明可知吉凶自此辯澄案龜卜占法今不傳據褚少孫所錄在史記龜策傳者每一事有一占法

各不同疑卜宅之占以兆食墨而明為吉不食則其兆曖昧非吉兆也先卜黎陽不吉乃卜洛邑二處而龜兆皆食其墨也佯使也使來將至所卜地圖及戲所卜吉兆也

王拜手稽首曰公不敢不敬天之休來相宅其作周匹休公既定宅佯來來視予卜休恒吉我二人共貞公其以予萬億年敬天之休

王拜手稽首者成王受周公獻卜之禮也曰者王授

使者以荅周公之辭匹配也視示同貞猶主也天將
休我國家欲俾宅土中而定命周公承天意來相宅
于洛所以敬天之休也相洛邑可定宅其休可與宗
周鎬京之地相配使來示予以卜觀卜兆則宅洛之
休非但一時之吉乃永久之吉予與公共當之公既
敬天休矣又當以予敬天休于萬億年之久也所責
望于公者遠矣

拜手稽首誨言

此亦王之辭併受之使者王自謂拜手稽首以答公之誨言也所謂拜手稽首即上文所記受獻卜之禮誨言即謂周公獻卜之辭拜手稽首誨言與後拜手稽首休享文同皆王行此禮又授此辭而使者以達于公也

此第一章周公在洛使于王

王若曰公明保予沖子公稱丕顯德以予小子揚文武烈奉答天命和恒四方民居師惇宗將禮稱秩元祀咸

秩無文惟公德明光於上下勤施于四方旁作穆穆迓
衡不迷文武勤教予冲子夙夜罔祀

公明保予公以其明而保我也保猶保傅之保稱丕
顯德所謂明也以予小子揚文武烈奉答天命和恒
四方民居師所謂保也和恒非止和于今和于久也
居師居洛師也博敦同猶敦匠之敦宗禮官將猶行
也稱秩謂舉行而秩序有功之臣也旁無方所也迓
迎也衡平也穆穆迓衡篤恭而天下平也不迷文武

所知所行不失文武之道也宅洛者所以發揚先烈
順承天眷輯睦民心也公舉其大明之德護衛我以
我如此而居于洛此王以宅洛之事功歸于公也今
當敷薦禮官舉行大祀雖祀典所無者咸秩敘之而
不遺惟公之德其明則光于上下其勤則施於四方
有功于天下而無愧于前人既以其明而保予矣又
以其勤而教予俾予夙興夜寐必謹于祀事也此王
以祀祀之事求教于公也

周公曰王肇稱殷禮祀於新邑咸秩無文予齊百工俾
從王于周予惟曰庶有事今王即命日記功宗以功作
元祀惟命曰汝受命篤弼丕視功載乃汝其悉自教工
孺子其朋孺子其朋其往無若火始燄燄厥攸灼敘弗
其絕厥若爨及撫事如予惟以在周工往新邑俾嚮即
有僚明作有功惇大成裕汝永有辭

此周公荅王請教之辭殷盛也與五年殷祭之殷同
齊謂整一之惟命之惟又也汝受命之汝王汝公也

乃汝之汝公汝王也朋謂比昵之私彝謂故常之事
撫如以手撫循之撫嚮謂心所專嚮明謂精明不眩
大謂功業盛大裕謂民生饒裕王始舉盛禮于新邑
予統率百官使從王于宗周予之心惟曰王將往洛
邑行祭禮庶幾各有所事今王即有命曰記錄功臣
之禮官以有功者與此大祭又有命曰汝周公受我
之命篤輔之我大視記功之典籍勿俾有所遺周公
既述成王所命而曰汝之命如此悉以自教令羣臣

矣案周官有功書于太常祭于太烝盤庚曰茲予大
享于先王爾祖其從與享之成王將烝祭故命禮官
錄有功者而祭之又命周公丕視功載也烝祀之事
王既自紹羣臣故周公惟務格王之心王新蒞政于
洛其心不可有比昵之私故曰孺子其朋乎孺子其
朋乎其往新邑也當杜私心私心之發始雖甚微終
必熾盛而不斷絕有如火然當遏之於微也王心既
正所謂一正君而國定其如故常之事及新至之事

則予之責也如予但以在周之百官往新邑使之專
邑就職精心作事百官各勝其任以敷其所已大以
成其所已裕則汝之休聞永世有辭矣

此第二章成王在鎬將往洛邑烝祭與周公問荅
之辭

王曰公予小子其退即辟于周命公後四方迪亂未定
于宗禮亦未克救公功迪將其後監我士師工誕保文
武受民亂為四輔

此成王在洛命公留洛之辭遣使致此辭于公也敕
慰撫綏安之意猶下文言寧禮記言康皆謂尊崇賞
賚也迪將語辭未詳其義士師工洛邑百工有士者
有師者師謂大夫文武受民謂洛之民皆文武所受
于天之民輔如車輔之輔謂夾輔于其旁漢三輔蓋
本諸此成王言我其退歸就君位于周今四方開治
之初未定宗人之禮亦未能崇獎公之功公其留後
于洛監臨我之士師工大保護文武所受之民治此

洛邑以為宗周之四輔

周公拜手稽首曰王命予來承保乃文祖受命民越乃
光烈考武王弘朕恭

此周公拜受王命而許之留洛亦以此文授使者以
荅王也來者來洛邑承保汝文祖之受命民及汝光
烈考武王之受命民此荅王誕保文武受命民之言
也武王之下不再言受命民者省文恪恭臣事君之
職也今又命我治洛是欲弘大我事君之恭也

孺子來相宅其大悖典殷獻民亂為四方新辟作周恭
先曰其自時中又萬邦咸休惟王有成績

前此王未至洛惟召公先相之周公盾相之今王初
來至洛故言相宅典猶主掌也獻民猶曰良民王來
相此洛邑之宅其大敦督主掌在洛之殷民致治而
為四方之新君作周家人君恭以禮下者之倡曰者
人所期望之言其自是居土中而治非但治殷民兼
治四方使萬邦無一不寧是惟王治功之成

予旦以多子越御事篤前人成烈答其師作周孚先考
朕昭子刑乃單文祖德

多子衆士也予統率羣士大夫增廣前人已成之烈
副答民衆之望為周家人臣信以事上者之倡成我
所以昭明乎子之儀刑乃能使王殫盡文祖之德昭
猶前篇昭文王昭武王之昭殫謂率而行之無不盡
也

佻來夔殷乃命寧予以秬鬯二卣曰明禋拜手稽首休

享予不敢宿則禋于文王武王

寧猶教也秬黍為酒芬香條暢謂之秬鬯所以裸神也
以賜公者敬公如神也
卣中尊也明潔也精意以享曰禋
王使我來洛邑化誨殷民乃有命綏寧我賚以秬鬯
二卣命曰此潔而可禋今拜手稽首以賚于公
其承此休而享受之
周公不敢留以經宿即以禋于文王武王敬之至也

惠篤敘無有違自疾萬年厭于乃德

遘遇自周公自己厭飽也言行之無已時也乃文武也周公禋于文武且為自己祝曰願篤敘文武所行庶獲助佑身其康強無有遇已身之疾至于萬年之久飽于文武之德

殷乃引考王侔殷乃承敘萬年其永觀朕子懷德

又為殷人祝曰願殷人以長壽考王能使之順從即敘至于萬年之久永永觀瞻我王所以懷之之德蓋公既許留洛治殷民故為己與殷民致祝也

此第三章後章所謂王命周公後作冊逸誥者冊之所書蓋即此章王曰之辭而逸傳王命以誥周公也或謂此章問答疑在烝祭之前者非是蓋周公既拜手稽首以受王命矣豈公既受命而始告文武也哉

王曰公定予往已公功肅將祗歡公無困哉我惟無斁其康事公勿替刑四方其世享

此周公既許王留洛王遂歸周而與公別也定止也

已語辭肅將未詳困猶倦也數厭也公其止留于此
予往歸宗周已公之功人皆愛敬之王願公留治洛
故曰公無倦哉我歸周當無數其安天下之事公更
久留洛無替其儀刑則四方其世世來朝享于周矣
公曰已汝惟沖子惟終

此周公于王歸宗周之時進教戒之辭也汝年尚幼
沖初政令如此矣惟當其終欲王有初有終也

汝其敬識百辟享亦識其有不享享多儀儀不及物惟

曰不享惟不役志于享凡民惟曰不享惟事其爽侮
成王有四方世享之語周公因言當識享上者之誠
偽多猶重也儀禮物幣也享之所重者重其禮也禮
不足而物有餘雖享猶不享也謂其不用志于享故
爾凡民見其如此亦曰雖享猶不享也諸侯無享上
之誠則其于事上之事必有差爽侮慢者矣其可不
辨之于早察之于微也

乃惟孺子頒朕不暇聽朕教汝于棊民彛汝乃是不獲

乃時惟不永哉

頌謂頌賜也。隸民彛非人之常道所不當為之事也。獲勉也。言王若但能頌賜我而不暇聽我教，汝不為所不當為之事，則是汝不自勉而天命將不永矣。

篤敘乃正父罔不若予，不敢廢乃命。汝往敬哉。茲予其明農哉。彼裕我民，無遠用戾。

正父武王也。彼謂宗周戾定也。篤敘，汝父武王之道。無或有不如者。汝命我治洛，我不敢廢棄汝所命令。

留洛矣汝往歸宗周其敬之哉我留于此其務審知
耕農之事以不奪民時汝在彼宗周而饒裕我民則
無問遐遠之地皆安定矣蓋邇安則遠安自然而然
也

王曰公功斐迪篤罔不若時

周公教王篤敘乃正父王謂公之功非但開導我以
篤敘而已蓋平日無一事不如是教我

此第四章王與周公問答之言蓋在烝祭之後王

將歸鎬之時

戊辰王在新邑烝祭歲文王駢牛一武王駢牛一

此以下記成王在洛之事考漢書歷志成王七年正月乙巳朔小二月乙亥朔小三月甲辰朔大四月甲戌朔小五月癸卯朔大六月癸酉朔小七月壬寅朔大八月壬申朔小九月辛丑朔大十月辛未朔小十一月庚子朔大閏月庚午朔小十有二月己亥朔大戊辰朔日也烝冬祭之名歲者適當歲終也駢赤

色周尚赤故用駢宗廟禮太牢此用特牛者命周公留後于洛故舉盛禮也

王命作冊逸祝冊惟告周公其後

作冊者作為冊書也逸史逸也祝讀冊以告神也作冊在祭前讀冊在祭之日冊惟告周公其後謂冊書之辭惟是誥文武以周公留後于洛之事

王賓殺禋咸格王入太室裸

王賓猶虞賓二王之後來助祭者或曰凡諸侯之君

皆曰賓殺殺牲之時禋初祭之時裸酌鬯以享也殺牲初禋之時助祭諸侯咸至及裸獻則王獨入太室之中也

王命周公後作冊逸誥

王命周公留後亦作冊書載命之之辭逸誥者讀冊以告周公也作冊在祭前祭畢而逸就公所授冊也在十有二月

以上事皆在十有二月明戊辰之為十二月之日也

書之常法當以日繫月以事繫日此先記日記事後
乃記月變例也大戴記公冠篇先載祝辭後乃曰維
某年某月上日亦此例

惟周公誕保文武受命

題上事也此篇自予小子其退即辟于周以後皆載
王命周公留後于洛誕保文武受命民之辭此九字
猶禮記文王世子篇文王之為世子章周公踐祚章
教世子章並題上事于章後

惟七年

題上年也雖已題其事未表其年故又記此言此篇所載事辭皆在成王之七年也洪範惟十有三祀表年于篇端也此篇惟七年表年于篇終也

此第五章前四章記言此一章記事也

多士

士殷之諸臣有位者

惟三月周公初于新邑洛用告商王士

召誥所謂甲子周公朝用書命庶殷即此篇也

王若曰爾殷遺多士弗弔旻天大降喪于殷我有周佑
命將天明威致王罰勅殷命終于帝肆爾多士非我小
國敢弋殷命惟天不畀允罔固亂弼我我其敢求位惟
帝不畀惟我下民秉為惟天明畏

周公稱王命以誥謂王之意若曰爾乃殷所遺之多
士不幸旻天大降下喪亡之禍于殷我有周為天佑
助而命之將奉天之明天之威致王者之罰以督促

殷命使終絕于天射取禽鳥曰弋爾衆士當知所以
王非我小國之周敢弋取殷之天命乃紂不為天所
與天信不堅固保護為亂之人所以弼我而使我不受
殷命也我豈敢求殷天位而有之哉乃紂不為帝所
與而我下民皆秉心以為我民心所歸即天命所歸
也或言天或言帝綜錯成文爾非有異也殷命非我
敢弋乃天不畀紂而我得之天位非我敢求乃帝不
畀紂而我有之畀我者天之明不畀紂者天之威也

故總之曰惟天明畏與威通

我聞曰上帝引逸有夏不適逸則惟帝降格嚮于時夏
弗克庸帝大淫泆有辭惟時天罔念聞厥惟廢元命降
致罰乃命爾先祖成湯革夏俊民甸四方自成湯至于
帝乙罔不明德恤祀亦惟天丕建保乂有殷殷王亦罔
敢失帝罔不配天其澤在令後嗣王誕罔顯于天矧曰
其有聽念于先王勤家誕淫厥泆罔顧于天顯民祗惟
時上帝不保降若茲大喪惟天不畀不明厥德凡四方

小大邦喪固非有辭于罰

上既言殷所以亡周所以興此又言夏亡殷興之事以見昔殷之代夏亦如今周之代殷也我聞人言上帝於人君之好逸樂者引而去之有夏之君若禹若啟若少康皆以憂勤合天意而不適於逸則上帝降格眷佑之嚮猶趨向之向謂趨而至也向至於夏桀不能用上帝之意天不好逸樂而桀乃適逸大淫溺於逸樂而有可罪之辭惟是之故天無復愛念聽

聞之遂廢絕其大命降致以罰謂夏亡而桀放也天
乃命爾殷士之先祖成湯改革夏之俊民為殷之俊
民而甸四方諸國之土地不言改夏民而言改夏俊
民蓋謂俊民且歸殷則凡民可知猶孟子言天下之
父歸之其子焉往也殷自成湯至帝乙皆能合天之
意無不克明其德勤恤祀事蓋人君為神天之主承
上下神祇與社稷宗廟然黍稷非馨明德惟馨故祀
事以明德為本殷之諸賢君知此故天大建立之為

王而保治有殷之國殷王為天所建立亦無敢失帝
之意無不益廣其德澤以配合乎天蓋言帝乙以上
諸王能順天意以保天下而紂不能然也在今後嗣
王謂紂也天意引勉而紂乃適逸是大不明于天之
意也況能耳聽心念先王克勤于家之事乎大淫於
其逸樂之事洪逸通無能顧視天之顯道與民之當
敬惟是之故上帝不保殷而降如此大喪亡之禍天
之所不與紂者以紂不明其德故耳因言凡四方小

大之國至于喪亡者無非皆有可罪之辭然則紂之
亡也亦以有辭于罰而天罰之也

王若曰爾殷多士今惟我周王丕靈承帝事有命曰割
殷告勅于帝惟我事不貳適惟爾王家我適予其曰惟
爾洪無度我不爾動自乃邑予亦念天即于殷大戾肆
不正

又呼殷士而與之言謂周所以王以我周王大善承
奉上帝之事故上帝有命命之割絕殷命遂告勅殷

之事于帝如湯將伐桀用玄牡昭告于帝也我于割
殷之事應天順人一舉而定不待再適殷都爾乃不
明天命所歸既亡復叛使我用兵遂至于再乃惟
爾商王之家召我適爾殷都也其曰者審度之辭武
庚之叛乃惟爾大為非度我不先起兵端于爾擾動
自爾邑作亂有以招致我之罰前既誅紂後又殺武
庚我亦惻然念及天就降于殷以此大災戾故使汝
以不正而取諸滅亡之禍也

王曰猷告爾多士予惟時其遷居西爾非我一人奉德
不康寧時惟天命無違朕不敢有後無我怨惟爾知惟
殷先人有冊有典殷革夏命令爾其曰夏迪簡在王庭
有服在百僚予一人惟聽用德肆予敢求爾于天邑商
予惟率肆於爾非予罪時惟天命

承上而言我惟是之故所以遷爾之居而西爾也紂
都在洛東自東遷而適西故曰西爾所以遷爾者非
我一人奉持其德好勞動爾不安寧爾也是惟天命

如此不可違逆我順天命不敢有後後猶緩也爾無
怨我爾殷王先世改革夏命為殷有冊書典籍記載
其事爾所知也今爾又言殷革夏之後簡拔其人使
在王庭有職于百僚今我一人惟有德者聽采而用
之爾若有德亦用爾也天邑商言商地舊為天子之
都我豈是敢以私意求索爾於天邑之商而遷爾於
洛乎予惟皆矜憫爾欲俾爾習於遷順不為叛亂以
保爾之生也遷爾非我之罪是惟天命當如此

王曰多士昔朕來自奄予大降爾四國民命我乃明致天罰移爾遐逝比事臣我宗多遜

昔我伐奄而歸之時大降下爾四國民以教命多方之書是也其時殷民未遷既告多方之後見殷民未化遂乃明致天罰移爾於遐遠之地謂遷洛也叛亂之人得免誅戮罪當流徙遷之者乃致天之罰也紂都距洛非甚遠而曰遐逝者以殷民安土之情則為遐逝也遷爾者欲俾爾親比服事臣順于我周多遜

之宗薰染以成習也宗謂士大夫之家各有宗以相
統

王曰告爾殷多士今予惟不爾殺于惟時命有申令朕
作大邑于茲洛予惟四方罔攸賓亦惟爾多士攸服奔
走臣我多遜爾乃尚有爾土爾乃尚寧榦止爾克敬天
惟畀矜爾爾不克敬爾不啻不有爾土予亦致天之罰
于爾躬今爾惟時宅爾邑繼爾居爾厥有榦有年于茲
洛爾小子乃興從爾遷

承上而言今我惟不欲殺汝故惟以是昔日誥多方之命又重言以告爾殷士欲使爾臣順我周而不致殺身也今我所以作大邑于此洛者一則為四方諸侯無所賓貢之地以洛是中土四方來者道里均故營洛以為朝會之所二則為爾殷多士遷徙在此就此朝會爾習見我周羣臣濟濟相遜爾所服事奔走臣順者皆多遜之人而爾亦化為多遜也蓋洛有二都一以賓諸侯者名東都又名王城所卜澗東瀍西

之地是也一以居殷民者名下都又名成周所卜澗
水東之地是也殷士化為多遜庶幾於此保有爾之
土田庶幾於此安寧如木之榦有所定止而枝葉得
以生長也敬者一心謹畏不敢怠忽之謂克敬則循
理而致福天所與而矜憐者也不克敬則悖理而取
禍是天所罰也不但不能保有爾土亦將不能保有
爾身此戒之之辭今爾惟於是立家而安處爾邑於
是傳世而繼續爾居有榦謂宅爾邑而基業植立有

年謂繼爾居而子孫永久爾後世子孫之興從爾遷
洛始此勸之之辭

王曰嗚呼猷告爾有方多士暨殷多士今爾奔走臣我
監五祀越惟有胥伯小大多正爾罔不克臬自作不和
爾惟和哉爾室不睦爾惟和哉爾邑克明爾惟克勤乃
事爾尚不忌于凶德亦則以穆穆在乃位克闕于乃邑
謀介爾乃自時洛邑尚永力畋爾田天惟畀矜爾我有
周惟其大介賚爾迪簡在王庭尚爾事有服在大僚

此篇為誥殷多士而作此又普告四方諸國衆士來
赴營洛之役者而及殷士之遷在洛者蓋欲諸國之
士共聞誥殷士之言也今爾之爾專指殷士殷士之
遷洛蓋在成王之三年此時為成王之七年故謂爾
奔走臣服於我所立之監已五年矣汝等多士其間
亦有衆胥之長與小官之正大官之正各為官長無
或不能守法也爾自身所為或猶有怨恨不和之心
繼今以後爾惟自變化而和哉非特爾身爾室家之

內猶或有陵犯不睦之人繼今以後爾惟變化而和之哉不和不睦謂不肯臣順於周也居爾之邑而能至於光顯由爾能勤其事之所致庶幾無有凶惡之德可忌諱也亦且肅敬在爾之位能臨視於爾之邑而所謀者大矣庶幾自此洛邑可以長保其祿天亦將畀矜於爾我周家亦將大有賜賚於爾簡拔而置之王庭庶幾爾之所事有服其事而至大官者非特保有爾邑土田而已此所謂大介賚也

王曰嗚呼多士爾不克勸忱我命爾亦則惟不克享凡
民惟曰不享

爾若不能勸勉以信奉我之教命是不能奉上而凡
為民者亦惟曰汝不奉上矣通前一節王曰嗚呼敲
告爾有方多士至此百五十一字舊本錯簡在多方
篇今從吳氏胡氏說釐正在此不享之下疑又闕文
又曰時予乃或言爾攸居

又曰上舊有王曰二字新安王氏曰王曰之上必有

脫簡又曰之下必有脫文不可強釋今案王氏說是也王曰之下脫簡即是誤在多方篇內者既取彼之文補之於此則此王曰二字宜行今刪去又曰蓋承上文惟曰而言述凡民之又曰也予自民言之予周王也爾爾殷士也洛邑殷士所居此篇叮嚀告教欲殷士永久安居於洛所謂言爾攸居也凡民又曰是我周王乃或能言爾所居諄切懇至如此非愛爾之深其能然乎爾殷士在下者不能敬上我周王在上

者乃能愛下不為必然之辭故曰或

無逸

成王漸長周公慮其嗜欲萌動故作此書教戒以篇首無逸二字名篇吳氏曰考於君奭立政洛誥諸篇周公於成王皆有冲孺幼小之稱而無逸獨無故知其為最後也

周公曰嗚呼君子所其無逸先知稼穡之艱難乃逸則知小人之依相小人厥父母勤勞稼穡厥子乃不知稼

穡之艱難乃逸乃諉既誕否則侮厥父母曰昔之人無
聞知

此篇七更端皆以嗚呼發之重嗟永嘆所以深感動
成王也君子小人以位言所語辭也古人盟誓之辭
發端皆曰所其者有所指而言無逸者勤勞而無休
息也勤勞之事非一而惟小人之於稼穡最為艱難
君子於人所勤勞之事首先能知乎此身體盡瘁濕
暘備嘗耕種耘穫終歲無有逸時此小人勞逸者之

為也君子雖不為之而能知之故乃暇逸之時則能
知小人之所倚賴以為生者在此而不敢厚斂多取
以困其力也視彼小人其父母勤勞於稼穡而為農
家之子乃不服田畝反不知稼穡之艱難故乃暇逸
之時猥習俚言既恣為夸誕矣不然則又侮訕其父
母曰古老之人無所聞知徒爾自苦也夫勞心以治
下者君子也勞力以奉上者小人也周公教戒成王
亦欲其勤勞於心目豈欲其勤勞於力哉然不知小

人勞力之事者必不能為君子勞心之事蓋勞心者
治人而食於人勞力者食人而治於人居人上者當
思我之崇高富貴凡宮室衣服飲食之奉無一不出
於民力彼之勞力以奉我者如此其至也我其可不
勞心以治之而使之得遂其生乎故此篇七節自第
二節以下皆以勤勞於心者勉成王而篇首獨舉勤
勞於力者為先俾王知小人勤勞稼穡之事其善於
格君心哉

周公曰嗚呼我聞曰昔在殷王中宗嚴恭寅畏天命自度治民祇懼不敢荒寧肆中宗之享國七十有五年

中宗大戊廟號嚴恭敬之形于外寅畏敬之主于中自度猶言自律自檢天命在躬易失難保故反躬自省謹循法則惟恐不能永保天命也天人相關知敬天命故亦敬民事以嚴恭治民為祇以寅畏治民為懼平日存心處事皆不敢迷亂怠弛中宗能如此所以能永年也

其在高宗時舊勞于外爰暨小人作其即位乃或亮陰三年不言其惟不言言乃雍不敢荒寧嘉靖殷邦至于小大無時或怨肆高宗之享國五十有九年

高宗武丁廟號亮陰居喪之名鄭氏讀為梁闇雍和也發言和順當於理也嘉者美之至靖者治安之謂高宗舊時勞苦于外及與小人遊處起自民間即天子位蓋嘗親歷民事艱難故發言不敢輕易居喪不言禮也然三年之久不出一言聖賢之君未必盡然

高宗獨能如此故謂乃或猶言是或一道也惟不輕
言故言發而當前此殷國中衰不可言靖況可言嘉
乎高宗存心處事亦如中宗不敢荒寧遂能中興嘉
靖殷國至于或小或大之人咸得其安無于是時而
或有怨者高宗能如此所以能永年也

其在祖甲不義惟王舊為小人作其即位爰知小人之
依能保惠于庶民不敢侮鰥寡肆祖甲之享國三十有
三年

鄭氏曰祖甲武丁子有兄祖庚武丁欲廢兄立弟祖甲甲以此為不義逃于民間故曰舊為小人澄案史記武丁崩祖庚立七年而崩祖甲起承帝位以其久在民間于是能知小人之所依用能愛護利澤于衆民雖窮民亦不敢慢忽祖甲能如此所以能永年也自時厥後立王生則逸生則逸不知稼穡之艱難不聞小人之勞惟耽樂之從自時厥後亦罔或克壽或十年或七八年或五六年或四三年

自時厥後夏氏以為或自中宗之後或自高宗之後
或自祖甲之後是也耽貪欲自侈之謂言自是三君
之後立而為王者生則好耽樂不知農事之艱難是
以不聞細民用力之勞而惟一已耽樂之欲是從以
此伐性戕生自是以後亦無或能壽者澄案史記中
宗之後仲丁十三年仲壬十五年所謂十年者也河
亶甲九年陽甲七年所謂或七八年者也高宗祖甲
之後廩辛六年所謂或五六年者也武乙四年大丁

三年所謂或四三年者也時成王稍長疑或有狗欲
促年之漸故周公丁寧戒之林氏曰此言商賢君止
于三酒誥多方多士言自成湯至帝乙罔非賢君蓋
與成王言則責其難不如三君之享國則不足稱與
商民言則樂道前王之善苟能紹湯之基業而不墜
則皆可稱不以辭害意可也

周公曰嗚呼厥亦惟我周太王王季克自抑畏

不特殷之三王如此周之三王亦然抑者貶損謙下

之意將言文王之事故原其家法之所自

文王卑服即康功田功徽柔懿恭懷保小民惠鮮鰥寡
自朝至於日中昃不遑暇食用咸和萬民文王不敢盤
于遊田以庶邦惟正之供文王受命惟中身厥享國五
十年

卑服猶禹之惡衣服也蓋舉一端而言凡宮室飲食
自奉之薄在其中矣康功安民之事田功養民之事
徽懿皆美也而徽有糾緊之意懿有淑善之意柔易

至于懦微柔則非不斷之柔恭易至于拘懿恭則非
不安之恭惠鮮謂惠利而甦鮮之使有生意也遑亦
暇也重言文王之薄于奉已而厚于養民斯有柔恭
之美德平易近民于民之微者則懷保之于民之窮
者則惠鮮之然此特一國之民爾紂毒痛四海文王
為方伯勤勞政事自早朝不食至于日中或至於日
昃猶不暇于食者蓋將用以咸和庶邦之萬民視民
如傷望道如未見其勤勞自不能已豈若後世量書

傳餐代有司之任者哉盤謂盤旋不已耽其樂也游

謂巡行田謂圍獵遊田有常制文王不敢過也以遊

田之簡可知百用之約故庶邦之供貢者惟正數而

已于外無一毫之多取方伯長諸侯所統庶邦皆有

常供春秋時齊晉稱伯諸侯各有貢物至唐猶有送

使之制其所從來舊矣受命謂嗣為諸侯內受命于

先君上受命于天子也中身文王九十七而終即位

時年四十七言中身舉全數也

周公曰嗚呼繼自今嗣王則其無淫于觀于逸于遊于
田以萬民惟正之供無皇曰今日耽樂乃非民攸訓非
天攸若時人丕則有愆無若殷王受之迷亂酗于酒德
哉

無毋通禁止辭觀謂覽視逸謂宴安或觀以舒目或
逸以休身或遊以省方或田以習武四者人君所不
能無特不可淫溺于此耳淫于四者則侈費無度必
至橫斂四者不淫用有常經而以萬民惟正賦之供

萬民畿內之民也正謂九貢九賦什一之制也無暇
言曰今日姑且耽樂人始耽樂者曰吾于今日為一
日之樂而已是心一流今日而明日或至終身忘返
者焉民生在勤天生不息但一日耽樂則非所以訓
民非所以若天是人大有德矣非小失也酒德以酒
為德也耽樂之事非一酒德為首故又專以此為戒
周公曰嗚呼我聞曰古之人猶胥訓告胥保惠胥教誨
民無或胥譎張為幻

訓告道說告詔之也有朋友之道焉保惠保護惠愛
之也有保傅之道焉教誨模範開曉之也有師道焉
講誦誼也張夸誕也變名易實以眩觀者曰幻古人
德業已盛其臣猶且相訓告相保惠相教誨夫如此
則視聽聰明是非不惑故民無或敢以誑誕之言而
為欺罔也

此厥不聽人乃訓之乃變亂先王之正刑至于小大民
否則厥心違怨否則厥口詛祝

正刑正法也心違怨者怨蓄于中也口詛祝者怨形于外也言成王于此古人胥訓告保惠教誨之事而不聽信則人乃道說之以變亂先王之正法先王之法甚便于民一變亂之則至于或小或大或有違怨于心者矣或有詛祝于口者矣

周公曰嗚呼自殷王中宗及高宗及祖甲及我周文王茲四人迪哲厥或告之曰小人怨汝詈汝則皇自敬德厥愆曰朕之愆允若時不啻不敢含怒

知小人之依而或忿戾者不能迪知也殷周四王允
蹈所知其或有人告曰小人心怨口詈則皇皇然自
敬其德反求諸已不尤其人其所誣毀之愆則安受
之曰我之愆信乎若是不但不敢藏怒而已

此厥不聽人乃或講張為幻曰小人怨汝詈汝則信之
則若時不永念厥辟不寬綽厥心亂罰無罪殺無辜怨
有同是叢于厥身

綽大也亂謂不當殺罰而殺罰之罰者不至于殺殺

者不止于罰叢聚也言成王于此殷周四王迪哲之
事而不聽信人乃或以誑誕無實之言相欺罔而曰
小人怨汝詈汝則信之則以為果若是蓋君道尚寬
大不長永思念其為君之道不寬綽其心信譸張無
實之人不知實無怨詈之事于是羅織殺事刑戮妄
亂及于無辜罪之人罪辜互文也向之怨詈設或有
之亦不過一二人耳至此則人同怨之是衆人之怨
叢于一身也

周公曰嗚呼嗣王其監于茲

其者期望之意茲者如此以上所陳也

君奭

召公封於燕留王朝為太保有國故稱君奭其名也武王時太公為太師周公以太傅行冢宰事武王崩武庚叛周公東征三年而歸蓋周公既歸而太公薨周公以太師與召公太保奭左右成王召公欲去周公留之而作此篇

周公若曰君奭弗弔天降喪于殷殷既墜厥命我有周既受我不敢知曰厥基永孚于休若天棗忱我亦不敢知曰其終出于不祥

不幸天降喪亡之禍于殷殷既墜其命而我有周既受之矣然天命難謀有德則常留無德則旋去孚者以實感以實應也永孚于休命之留也不祥者休之反出于不祥命之去也雖曰我周既受天命然謂其基必可久長我所不敢知也雖曰天非可信然謂其

終必至失墜我亦不敢知也呂氏曰自後世之私言之殷之喪周之福也而亦曰弗弔蓋聖賢以天下為心不幸遇喪亂而任此責豈所樂哉

嗚呼君已曰時我我亦不敢寧于上帝命弗永遠念天威越我民罔尤違惟人

嗚呼君奭歎而呼召公以告之也君已皆一字為句已字義見康誥大誥曰時我承上文言天命去留國祚脩短我皆不敢知則臣之事君惟當竭人力以保

天命是我之責也然我亦不敢安于上帝之命而不
永遠思念天威及我民之無尤無違者惟在于得人
也

在我後嗣子孫大弗克恭上下過佚前人光在家不知
天命不易天難諶乃其墜命弗克經歷嗣前人恭明德
過絕佚失也先王既受天命為後嗣子孫者若大不
能恭承天地之祀事過佚前人盛德之輝光居深宮
之中不知天命之不易保則天命難信乃或至墜失

其命不復能經歷久遠而繼嗣前人之恭德明德矣
恭上下者前人之恭德光者前人之明德也

在今予小子旦非克有正迪惟前人光施于我沖子又
曰天不可信我道惟寧王德延天不庸釋于文王受命
施延及也釋解去也在今我小子旦之身非能自有
所正於王迪惟前人盛德之輝光可以延及于我沖
子又言天命不可信我之道惟以寧王之德必可延
長此命故周自文王始受天命傳于至今子孫天不

庸釋去之也

公曰君爽我聞在昔成湯既受命時則有若伊尹格于
皇天在太甲時則有若保衡在大戊時則有若伊陟臣
扈格于上帝巫咸又王家在祖乙時則有若巫賢在武
丁時則有若甘盤率惟茲有陳保又有殷故殷禮陟配
天多歷年所

又舉商家所以能創業守成中興者皆得大臣為之
輔相以見召公未可去也成湯之時其臣有如伊尹

能相湯以格于皇天湯雖聖亦賴伊尹之助也湯孫
太甲之時其臣有如保衡保衡即伊尹以其保護王
躬而天下之事皆取平焉故曰保衡蓋太甲始立是
號以尊伊尹而不名太甲孫太戊之時則有如伊尹
之子陟與臣扈能相太戊以格于上帝巫咸不及伊
陟臣扈亦能治王家之事巫賢巫咸子保衡巫賢甘
盤之下不言其事蓋無可指定而言者也陳如陳力
之陳陟猶言升遐也禮陟以禮而終謂善終也總言

商五君所用此六臣皆有所陳以保人有殷之國故
殷王各保其位以禮善終得配天為王者六百餘年
呂氏曰伊尹佐湯以聖輔聖與天無間故曰格于皇
天伊陟臣扈佐太戊以賢輔賢克厭帝心故曰格于
上帝自其徧覆包含言之謂之天自其主宰言之謂
之帝凡書或稱天或稱帝各隨所指此對言之則見
聖賢之分

天惟純佑命則商實百姓王人罔不秉德明恤小臣屏

侯甸矧咸奔走惟茲惟德稱用又厥辟故一人有事于四方若卜筮罔不是孚

百姓王畿之民王人王朝之士也承上文言天惟於商純篤佑助而命之者非特大臣得人而已則以商家實是內而百姓之賤王人之微無不秉執其德明於其所當憂勤之事外而侯國之小臣為藩屏在侯服甸服者與其一切奔走任事之人惟此諸臣惟德是舉用以治其國君之事以此之故凡天子苟有所

為于四方辟如卜筮之占無不以實應者

公曰君與天壽平格保乂有殷有殷嗣天滅威令汝永念則有固命厥亂明我新造邦

平格謂無一事不與天通也心通乎天必得其壽伊尹而下六臣能相其君以平格于天故能保乂有殷多歷年所至于殷紂亦嗣天位乃驟罹滅亡之威天不壽之者何哉蓋無賢臣輔之以格于天故爾今汝永遠念及此則我周可有堅固不墜之命其能常治

而顯明我新造之周邦矣

公曰君奭在昔上帝割申勸寧王之德其集大命于厥躬惟文王尚克脩和我有夏亦惟有若虢叔有若闕天有若散宜生有若泰顛有若南宮括又曰無能往來茲迪彝教文王茂德降于國人亦惟純佑秉德迪知天威乃惟時昭文王迪見冒聞于上帝惟時受有殷命哉

呂氏曰割裁也澄案禮記緇衣篇引此割申勸寧王作周田觀文王今詳割字無義周字疑當作用田觀

當從書作申勸寧王當從禮記作文王申重也再三
丁寧之意勸猶褒賞之也言天意用以厚報文王之
德所以集大命于其躬脩謂完備無所虧缺脩和猶
曰咸和號國叔字文王弟閔散秦南宮皆氏天宜生
顛括皆名蔑無也文王之心求賢如不及視民如傷
雖有五臣為助而其心歉然又言無能往來於此而
導迪常教者德已及民而自視猶若無德及於國人
聖人之不敢自足者如此亦惟天篤佑我周家秉德

迪知天威之臣乃能於是而顯其君使其德著見上
聞于上帝故能于是而受有殷命也

武王惟茲四人尚迪有祿後暨武王誕將天威咸劉厥
敵惟茲四人昭武王惟冒丕單稱德

武王時虢叔已死死者曰不祿四人猶及武王之世
故曰尚迪有祿劉殺也謂誅紂及其黨單盡也四臣
能顯其君使徧覆包含大盡其所稱舉之德林氏曰
文武佐命元功多矣獨稱虢叔等五人者豈其逮事

王季遂及文武耶伊尹事湯又事太甲伊陟乃尹子
臣卮非湯舊臣即殷世臣巫咸巫賢世為大臣甘盤
小乙舊臣以遺武丁周公所舉皆世臣舊德故武丁
世不及傳說文武世不及太公今周公與召公正如
殷之六臣文武之五臣豈可去乎

在今予小子旦若遊大川予往暨汝奭其濟小子同未
在位誕無我責收罔助不及者造德不降我則鳴鳥不
聞矧曰其有能格

遊浮水也當此重任若遊大川予之往也與汝共遊
其思所以濟我而至于岸周公居東時召公專任國
事今周公雖已歸而在位然謂召公今日任事當同
于昔日我未有位之時大無諉責于我而欲去造猶
脩為也鳴鳥鳳也時周方隆盛鳴鳳在郊召公若收
斂而去無以勗我之所不及者老退處自脩其德而
德不降下于民則我不能保今日之盛在郊之鳳將
不復鳴況曰能格于天乎

公曰嗚呼君肆其監于茲我受命無疆惟休亦大惟艱
告君乃猷裕我不以後人迷

周公歷述殷周世臣又歎而言令召公監視于此者
以我家受命為天子固有無窮之休祥然天命未易
保亦有至大之艱難我告汝以予心所謀汝當有以
裨益我使我不以文武之後人昏迷于永保天命之
道也

公曰前人敷乃心乃悉命汝作汝民極曰汝明勗偶王

在亶乘茲大命惟文王德丕承無疆之恤

此前人指武王偶猶配也夫與妻為偶君與臣為偶
乘載也猶負荷也承猶當也周公與召公同受武王
顧命輔成王故言前人宣布其心志以命汝俾汝位
三公作汝民之極其意曰汝當明勉輔所偶之王在
今誠宜負荷此武王當日之大命惟率循文王之德
以當此無窮之憂責其可求去乎

公曰君告汝朕允保奭其汝克敬以予監于殷喪大否

肆念我天威予不允惟若茲誥予惟曰襄我二人汝有
合哉言曰在時二人天休滋至惟時二人弗戡其汝克
敬德明我俊民在讓後人于丕時嗚呼篤棗時二人我
式克至于今日休我咸成文王功于不怠丕冒海隅出
日罔不率俾

告汝以予中心之誠實汝克敬謂不敢怠忽也以我
監視于殷之喪亡大否者我念天威之可畏不但是
中心如此多誥而已予惟曰勤力輔治者我二人也

襄字義如臯陶謨襄哉之襄汝之見有合于此則亦當曰在是二人也若曰今日天之休命滋至功業日隆福祿日增惟是二人將弗能勝其在汝惟能不怠忽于德益加抑畏明揚賢俊之人布列于位若他日治功大成之時汝乃可告于嗣王辭遜而去今則未可也又嘆而言若非是二人則我周用能至于今日之休美乎我等皆當同心協力終始不怠以成完文王治天下之功大所覆冒雖海隅出日之地亦無不

屬吾之使令者如此方為丕時

公曰君子不惠若茲多誥予惟用閔于天越民

言予不但惠順于汝而若此多誥予惟用憂天命人心之不常所以拳拳留汝輔治也

公曰嗚呼君惟乃知民德亦罔不能厥初惟其終祇若茲往敬用治

惟汝諳力之久能知民之德人亦無不能于其初者惟當于其終而如其初汝其敬順此所誥之言往而

敬用以治事上章言天命民心民心又天命之本故
卒章專言民德篇內後嗣子孫沖子後人皆謂成王
小子皆周公自稱

多方

孟子曰周公相武王誅紂伐奄討其君驅飛廉
於海隅而戮之滅國者五十書序曰成王東伐
淮夷遂踐奄奄東方之國蓋與淮夷相近武王
崩奄及淮夷徐戎與武庚同叛周公東征之二

年誅武庚其時伯禽在魯征徐伐奄及淮夷雖
為魯所遏不得猖獗然未及聲罪致伐吳氏曰
周公東征三年而歸明年奉王東伐淮夷遂踐
奄還歸於豐而作多方及營洛邑成周而作多
士澄案吳氏說與胡氏皇王大紀同今書多士
在多方之前者失其次也多方之書蓋以伐奄
而還有俘囚之民與東方諸侯偕至宗周者既
不誅戮俾教告之而復遣之歸仁之至也孟子

所謂伐奄戮飛廉滅國五十疑皆此時之事不
與相武王誅紂同時也

惟五月丁亥王來自奄至于宗周

五月蓋成王三年之五月宗周鎬京也

周公曰王若曰猷告爾四國多方惟爾殷侯尹民我惟
大降爾命爾罔不知洪惟圖天之命弗永寅念于祀

此時王與周公同在鎬京止稱王若曰恐疑為王之
自誥故先稱周公曰而後稱王若曰以見王不親臨

而周公傳王命以告也大誥亦是周公以王命誥而直稱王若曰者以其時王居憂周公攝政出征非王自誥可知故不稱周公曰也四國謂四方諸國多方謂諸國之民非一處也惟猶及也殷侯尹民殷諸侯之尹其民者正謂誥民而因及其君也降下命誥命也圖計度也天命已去商知大度乎此則必不徼覲以謀興復恭順事上可保祭祀長敬念乎此則必不叛亂以取誅滅

惟帝降格于夏有夏誕厥逸不肯感言于民乃大淫昏
不克終日勸于帝之迪乃爾攸聞厥圖帝之命不克開
于民之麗乃大降罰崇亂有夏因甲于內亂不克靈承
于旅罔丕惟進之恭洪舒于民亦惟有夏之民叨愆日
欽劓割夏邑天惟時求民主乃大降顯休命于成湯刑
殄有夏惟天不畀純乃惟以爾多方之義民不克永于
多享惟夏之恭多士大不克明保享于民乃胥惟虐于
民至于百為大不克開乃惟成湯克以爾多方簡伐夏

作民主慎厥麗乃勸厥民刑用勸以至于帝乙罔不明
德慎罰亦克用勸要囚殄戮多罪亦克用勸開釋無辜
亦克用勸今至于爾辟弗克以爾多方享天之命

周之伐殷猶殷之伐夏也故先舉夏亡殷興之事次
及殷亡周興之事以喻殷民使之知天命也感憂言
語辭淫昏謂沈溺迷惑勸勤勉之意帝之迪謂天道
開通悟也麗民所依也甲始也旅祭名周官有大故
則旅上帝靈承于旅猶曰靈承帝事也進之恭猶曰

日躋之敬也舒緩叨貪愆忿日欽謂孜孜為惡猶孜孜為善者之敬也劓割謂傷害之夏邑畿內之民也身饗通謂歆受而有之也恭多士桀以為恭而任之

者也簡者閱視選擇之意夏之盛時帝降格于夏而眷佑之有道桀大其縱逸不肯憂民之憂大為淫昏而不能一日勸勉于帝之廸此乃爾所素聞善圖帝命者惟得民心則天命固矣桀則不然其圖帝之命也不能通悟民之所依故天降罰而增崇其亂于有

夏國之治者天福之也國之亂者天罰之也桀之亡
因始于其家國之亂遂至失天下而不克靈承上帝
之祀事蓋以桀無能日躋其敬以寬裕其民乃惟日
務貪虐以傷害其民桀既不君天惟于是求其可以
為民主者而大降光顯休美之命于成湯俾伐夏而
絕其命惟天不與桀故不能以爾多方之義民永久
多年享而有之民之於君以義合天與之則能有其
民天不與則不能有其民矣故曰義民非特桀一人

為虐夏之多士亦大不能明而保享其民乃相與共
虐其民至于凡百所為皆不能通悟於保享其民之
事惟湯能以爾多方之民為臣所簡選以代夏而為
之主蓋湯心謹慎惟恐民失其依故乃勸勉加意於
其民尤于刑而加意由湯至于帝乙三十一君無不
明其德以導民慎其罰而不輕亦能加意于獄訟要
囚之人要囚之中又有分別其多罪者殄戮之亦能
加意而非失入其無辜者開釋之亦能加意而非失

出湯後諸王皆能如此今至于爾君紂乃不如此所以亡國而不能以爾多方享有天命也

嗚呼王若曰誥告爾多方非天庸釋有夏非天庸釋有殷乃惟爾辟以爾多方大淫圖天之命屑有辭乃惟有夏圖厥政不集于享天降時喪有邦間之乃惟爾商後王逸厥逸圖厥政不蠲烝天惟降時喪惟聖罔念作狂惟狂克念作聖天惟五年須臾之子孫誕作民主罔可念聽天惟求爾多方大動以威開厥顧天惟爾多方罔

堪顧之惟我周王靈承于旅克堪用德惟典神天天惟式教我用休簡畀殷命尹爾多方

周公又更端而言先自歎而後稱王命以告爾辟承有夏有殷之文兼言桀紂屑輕小之意不集于享謂諸侯離心不能合聚之使來朝享也有邦謂商間猶伐也蠲潔也詩曰吉蠲為饎烝冬祭名不蠲烝若所謂昏棄厥祀弗答也聖謂明智狂謂昏惑五年當時蓋有所指今不可考須待也暇寬暇也之子孫猶之

子于歸之之念聽謂有善可愛念而徹天之聽也動
謂警發之顧乃眷顧之顧堪可勝也教謂若天啟其
衷也夏殷之亡非天釋去之皆其自取惟桀紂有爾
多方而大淫于惡以圖天之命一一皆有可罪之辭
既總言之以下又分言桀紂然于夏則降時喪之下
惟有邦間之一句于商則降時喪之下自惟聖罔念
至尹爾多方累十餘句蓋前一節言夏已詳而言殷
猶略故于此一節略於夏而詳於殷也明智之人一

不念則即為昏惑昏惑之人一克念則即為明智故
紂雖極惡未嘗不可改而善也自武王克商之年追
數五年之前紂惡已極商已當亡然天以其為商先
王子孫故須待寬假未遽亡之猶冀其能改可作民
主及五年之久紂卒無一善之可念聽天于是求民
主于四方諸侯大動以謹告商紂之威開悟爾多方
之國顧有可勝天之眷顧者而爾多方又無可勝眷
顧之人惟我周王善奉皇天之祀克用其德遂令為

神天之主天實教我而用休美之命以休之簡選而
畀之以殷命使尹爾之多方也

今我曷敢多誥我惟大降爾四國民命爾曷不忱裕之
于爾多方爾曷不夾介乂我周王享天之命爾曷不惠
王熙天之命爾乃迪屢不靜爾心未愛爾乃不大宅天
命爾乃屑播天命爾乃自作不典圖忱于正爾乃惟逸
惟頗大遠王命則惟爾多方探天之威我則致天之罰
離逖爾土令爾尚宅爾宅改爾田我惟時其教告之我

惟時其戰要囚之至于再至于三乃有不用我降爾命
我乃其大罰殛之非我有周秉德不康寧乃惟爾自速
辜

夾左右輔之也介相助也又猶用又厥辟之又惠順
也熙光顯也播棄也不典逆理亂常也圖忱于正謂
圖復商也大遠猶曰大逆也遠者違去也離遯爾土
謂離去所居遠徙它處也上文言商之亡周之興皆
天命謀復商者不知天命也所以不容不以言解惑

令我曷敢多言以告我惟大降下爾四國之民以教
命也爾多方何不誠心以利益于爾乎何不輔助我
周王享有天命乎何不順惠我王光顯天命乎爾乃
導迪至屢而尚不安靖爾心未能自愛乃大不安天
命乃輕棄天命乃自為逆亂圖欲使已亡之國誠得
再居天下之正乃惟縱逸頗僻大逆王命則惟爾多
方採取天之禍我則當致天之罰徙遠爾所居之土
我周仁厚未忍遽流放爾今爾庶幾得以如舊保有


爾之田宅我惟於是而教告汝我惟於是而戰汝之
國訊汝之罪俘汝之身以至於此略示懲戒既不殺
汝而復使汝歸宅汝之宅田汝之田若至再至三又
不用我所降之教命我乃大罰殛汝罰即上文天罰
之罰殛猶殛鯀之殛謂遷徙流放也至此之時非我
有周所秉之德不能安寧乃汝自召此罪多方蓋是
徐奄淮夷及所滅五十國之人從殷以叛者罪當流
放今但告之曰離逝曰罰殛而未忍刑之其後多方

之民卒免遷徙惟紂都之民懷商之念深慮其不靜
故于是年遷洛所遷者紂都之民非多方之民也

王曰我不惟多誥我惟祇告爾命又曰時惟爾初不克
敬于和則無我怨

我非是多誥惟敬告爾以教命而已又言是惟爾之
一初乃爾去惡從善改舊為新之時若自今以後不
能敬行和睦之道猶復乖戾則自底于罰無我怨也

書纂言卷四之三



覆校官編修臣張秉愚
校對官檢討臣龔大萬

謄錄監生臣杜成